

思益梵天所问经

姚秦三藏法师鸠摩罗什译



南無本師釋迦牟尼佛


说明

本简体校正版《思益梵天所问经》电子书，根据《乾隆大藏经》大乘五大部外重译经，第 0186 部，姚秦三藏法师鸠摩罗什译《思益梵天所问经》原藏影印本校正。句读仅作参考。

本电子书是免费结缘品。特此说明。

仁慧草堂

二〇二〇年八月



扫码关注仁慧草堂微信公众号

目 录

起诵仪	- 1 -
香赞	- 1 -
净口业真言	- 1 -
净三业真言	- 1 -
安土地真言	- 1 -
普供养真言	- 2 -
开经偈	- 2 -
思益梵天所问经卷第一	- 3 -
如来光明品第一	- 3 -
四法品第二	- 12 -
菩萨正问品第三	- 17 -
四谛品第四	- 30 -
叹功德品第五	- 32 -
思益梵天所问经卷第二	- 38 -
如来五力说品第六	- 38 -
如来大悲品第七	- 43 -
幻化品第八	- 46 -
菩萨光明品第九	- 53 -
菩萨受记品第十	- 61 -
萨婆若品第十一	- 67 -
思益梵天所问经卷第三	- 72 -
菩萨无二品第十二	- 72 -
名字义品第十三	- 79 -
论寂品第十四	- 83 -
如来二事品第十五	- 89 -
得圣道品第十六	- 97 -
志大乘品第十七	- 100 -
发菩提心品第十八	- 109 -
思益梵天所问经卷第四	- 118 -
师子吼品第十九	- 118 -

梵行牢强精进品第二十.....	- 121 -
海喻品第二十一.....	- 125 -
建立法品第二十二.....	- 133 -
如来神咒品第二十三.....	- 137 -
嘱累品第二十四.....	- 144 -
结诵仪.....	- 147 -
补阙真言.....	- 147 -
补阙圆满真言.....	- 147 -
普回向真言.....	- 147 -
礼佛发愿文.....	- 148 -
回向偈.....	- 149 -
三皈依.....	- 150 -

●起诵仪

香赞

(一遍)

炉香乍爇. 法界蒙薰. 诸佛海会悉遥闻. 随处
结祥云. 诚意方殷. 诸佛现全身.

南無香云盖菩萨摩诃萨 (合掌三称)

净口业真言

(三遍)

唵. 修唎修唎. 摩诃修唎. 修修唎. 萨婆诃.

净三业真言

(三遍)

唵. 娑嚩. 娑嚩秫驮. 娑嚩达摩娑嚩. 娑嚩秫度憾.

安土地真言

(三遍)

南無三满哆. 母驮喃. 唵度噜度噜. 地尾. 娑婆诃.

普供养真言

(三遍)

唵. 誝誝曩. 三婆嚩. 鞞日啰斛.

南無本师释迦牟尼佛 (合掌三称)

开经偈

(一遍)

无上甚深微妙法 百千万劫难遭遇
我今见闻得受持 愿解如来真实义

思益梵天所问经卷第一

姚秦三藏法师鸠摩罗什译¹

如来光明品第一²

如是我闻：

一时，佛在³王舍城迦兰陀竹林，与大比丘僧六万四千人俱。菩萨摩訶萨七万二千人，皆众所知识，得陀罗尼无碍辩才及诸三昧，于诸神通无所罣碍，善能晓了诸法实性，悉皆逮得无生法忍。其名曰：文殊师利法王子、宝手法王子、宝积法王子、宝印手法王子、宝德法王子、虚空藏法王子、发心转法轮法王子、网明法王子、障诸烦恼法王子、能舍一切法⁴王子、德藏法王子、华严法王子、师子法王子、月光法王子、尊意法王子、善庄严法王子。

及跋陀罗婆⁵等十六贤士：跋陀婆罗菩萨、宝积菩萨、星德菩萨、帝天菩萨、水天菩萨、善力菩萨、大意菩萨、殊胜意菩萨、增意菩萨、善

¹ 丽本：姚秦龟兹国三藏鸠摩罗什译

² 丽本：序品第一

³ 丽本：住；永乐北藏本及龙藏本：在

⁴ 丽本：法法；永乐北藏本及龙藏本：法

⁵ 丽本：婆罗；永乐北藏本及龙藏本：罗婆

发意菩萨、不虚见菩萨、不休息菩萨、不少意菩萨、导师菩萨、日藏菩萨、持地菩萨，如是等菩萨摩訶萨七万二千人。

及四天王释提桓因等，忉利诸天、夜摩天、兜率陀天、化乐天、他化自在天，及梵王等诸梵天；并余无量诸天、龙、鬼、神、夜叉、乾⁶闼婆、阿修罗、迦楼罗、紧那罗、摩睺罗伽，人与非人普皆来集。

尔时世尊，大众恭敬围绕，而为说法。于是⁷网明菩萨即从坐起，偏袒右肩，右膝著地，头面礼佛足，合掌向佛，动此三千大千世界引导起发一切大众，而白佛言：“世尊！我欲从佛少有所问，若佛听者乃敢咨请。”

佛告网明：“恣汝所问，当为解说悦可尔心。”

于是网明既蒙听许，心大欢喜，即白佛言：“世尊！如来身相超百千万日月光明；我自惟念：‘若有众生能见佛身，甚为希有！’我复惟念：‘若有众生能见佛身，皆是如来威神之力！’”

佛告网明：“如是，如是！如汝所言，若佛不加威神，众生无有能见佛身，亦无能问。网明

⁶ 丽本：犍；永乐北藏本及龙藏本：乾

⁷ 丽本：时；永乐北藏本及龙藏本：是

当知！如来有光，名寂庄严，若有众生遇斯光者，能见佛身不坏眼根；又如来光名无畏辩，若有众生遇斯光者，能问如来其辩无尽；又如来光名集诸善根，若有众生遇斯光者，能问如来转轮圣王行业因缘；又如来光名净庄严，若有众生遇斯光者，能问如来天帝释行业因缘；又如来光名得自在，若有众生遇斯光者，能问如来梵天王行业因缘；又如来光名离烦恼，若有众生遇斯光者，能问如来声闻乘所行之道；又如来光名善远离，若有众生遇斯光者，能问如来辟支佛所行之道；又如来光名益一切智，若有众生遇斯光者，能问如来大乘佛事；又如来光名曰⁸往益，佛来去时足下光明，众生遇者命终生天；又如来光名一切庄严，若佛入城放斯光明，众生遇者得欢喜乐，一切庄⁹饰之具庄严其城，城中宝藏从地涌¹⁰出；又如来光名曰震动，佛以此光能动无量无边世界；又如来光名曰生乐，佛以此光能灭地狱众生苦恼；又如来光名曰上慈，佛以此光能令畜生不相恼害；又如来光名曰凉乐，佛以此光能灭饿鬼饥渴热恼；又如来光名曰明净，佛以此光使盲者得视；又如

⁸ 丽本：为；永乐北藏本及龙藏本：曰

⁹ 丽本：严；永乐北藏本及龙藏本：庄

¹⁰ 丽本：踊；永乐北藏本及龙藏本：涌

来光名曰聪听，佛以此光能令众生聋者得听；又如来光名曰惭愧，佛以此光能令众生狂者得正；又如来光名曰止息，佛以此光能令众生舍十不善道，安住十善道；又如来光名曰离恶，佛以此光能令邪见众生皆得正见；又如来光名曰能舍，佛以此光能破众生悭贪之心，令行布施；又如来光名无恼热，佛以此光能令毁禁众生皆得持戒；又如来光名曰安利，佛以此光能令瞋恨众生皆行忍辱；又如来光名曰勤修，佛以此光能令懈怠众生皆行精进；又如来光名曰一心，佛以此光能令妄念众生皆得禅定；又如来光名曰能解，佛以此光能令愚痴众生皆得智慧；又如来光名曰清静，佛以此光能令不信众生皆得净信；又如来光名曰能持，佛以此光能令少闻众生皆得多闻；又如来光名曰威仪，佛以此光能令无惭众生皆得惭愧；又如来光名曰安隐，佛以此光能令多欲众生断除淫欲；又如来光名曰欢喜，佛以此光能令多怒众生断除瞋恚；又如来光名曰照明，佛以此光能令多痴众生断除愚痴；又如来光名曰遍行，佛以此光能令等分众生断除等分；又如来光名示一切色，佛以此光能令众生皆见佛身无量种色。网明当知！如来若以一劫、若减一劫，说此光明力用名号不

可穷尽。”

尔时，网明菩萨白佛言：“未曾有也。世尊！如来身者即是无量¹¹光明之藏，说法方便亦不可思议。世尊！我自昔来未曾闻此光明名号。如我解佛所说义，若有菩萨闻斯光明名号，信心清净，皆得如是光明之身。世尊！唯¹²愿今日放请菩萨光，令他方菩萨善能问难者见斯光已，发心来此娑婆世界。”

尔时，世尊受网明菩萨请已，即放光明照此三千大千世界，普及十方无量佛土。于是诸方无量百千万亿菩萨见斯光已，皆来至此娑婆世界。

时¹³，东方过七十二恒河沙佛土，有国名清洁，佛号日月光如来、应¹⁴、正遍知，今现在其佛土。有菩萨梵天，名曰思益，住不退转。见此光已，到日月光佛所，头面作礼，白佛言：“世尊！我欲诣娑婆世界释迦牟尼佛所，奉覲¹⁵供养，亲近咨受；彼佛亦复欲见我等。”其佛告言：“便往。梵天，今正是时！彼娑婆国有若干千亿诸菩萨集，汝应以¹⁶十法游于彼土。何等为十？于毁

¹¹ 丽本：无量无边；永乐北藏本及龙藏本：无量

¹² 丽本：惟；永乐北藏本及龙藏本：唯

¹³ 丽本：尔时；永乐北藏本及龙藏本：时

¹⁴ 丽本：应供；永乐北藏本及龙藏本：应

¹⁵ 丽本：见；永乐北藏本及龙藏本：覲

¹⁶ 丽本：以此；永乐北藏本及龙藏本：以

于誉，心无增减；闻善闻恶，心无分别；于诸愚智，等以悲心；于上、中、下众生之类，意常平等；于轻毁供养，心无有二；于他阙失，莫¹⁷见其过；见种种乘，皆是一乘；闻三恶道，亦勿惊畏；于诸菩萨，生如来想；佛出五浊世¹⁸，生希有想。梵天！汝当以此十法游彼世界。”

思益梵天白佛言：“世尊！我不敢于如来前作师子吼，我所能行佛自知之。今当以此十法游彼世界，一心修行。”

尔时，日月光佛国有诸菩萨白佛¹⁹言：“世尊！我得大利，不生如是恶众生中。”其佛告言：“善男子，勿作是语！所以者何？若菩萨于此国中百千万²⁰劫净修梵行，不如彼土从旦至食无瞋碍心，其福为胜。”

时²¹有万二千菩萨与思益梵天俱共发来，而作是言：“我等亦欲以此十法游彼世界，见释迦牟尼佛。”于是思益梵天与万二千菩萨俱于彼佛土忽然不现，譬如壮士屈伸臂顷，到娑婆世界释迦牟尼佛所，却住一面。

¹⁷ 丽本：不；永乐北藏本及龙藏本：莫

¹⁸ 丽本：浊；永乐北藏本及龙藏本：浊世

¹⁹ 丽本：其佛；永乐北藏本及龙藏本：佛

²⁰ 丽本：亿；永乐北藏本及龙藏本：万

²¹ 丽本：即时；永乐北藏本及龙藏本：时

尔时，佛告网明菩萨：“汝见是思益梵天不？”

“唯然！已见。”

“网明当知！思益梵天于诸正问菩萨中为最第一，于诸善分别诸法菩萨中为最第一，于诸说随宜经意菩萨中为最第一，于诸慈心菩萨中为最第一，于诸悲心菩萨中为最第一，于诸喜心菩萨中为最第一，于诸舍心菩萨中为最第一，于诸软语菩萨中为最第一，于诸不瞋痴²²菩萨中为最第一，于诸先意问讯菩萨中为最第一，于诸决疑菩萨中为最第一。”

尔时，思益梵天与万二千菩萨俱，头面礼佛足，右绕三匝，合掌向佛，以偈赞曰：

世尊大名称	普闻于十方
所在诸如来	无不称叹者
有诸余净国	无三恶道名
舍如是妙土	慈悲故生此
佛智无减少	与诸如来等
以大悲 ²³ 本愿	处斯秽恶土
若人于净国	持戒满一劫
此土须臾间	行慈为最胜

²² 丽本：碍；永乐北藏本及龙藏本：痴

²³ 丽本：慈；永乐北藏本及龙藏本：悲

若人于此土 起身口意罪
应堕三恶道 现世受得除
生此土菩萨 不应怀忧怖
设有恶道罪 头痛即得除
此土诸菩萨 若能守护法
世世所生处 不失于正念
若人欲断缚 灭烦恼业罪
于此土护法 增益一切智
净土多亿劫 受持法解说²⁴
于此娑婆界 从旦至食胜
我见喜乐国 及见安乐土
此中无苦恼 亦无苦恼名
于彼作功德 未足以为奇
于此烦恼处 能忍不可事
亦教他此法 其福为最胜
我礼无上尊 大悲救苦者
能为恶众生 说法甚为²⁵难
佛集无量众 十方世界中
名闻诸菩萨 听法无厌足
佛集十方界 名闻诸菩萨

²⁴ 丽本：脱；永乐北藏本及龙藏本：说

²⁵ 丽本：为甚；永乐北藏本及龙藏本：甚为

听法无厌足 如海吞众流
为如是人等²⁶ 广说于佛道
释梵四天王 诸天龙神等
皆集欲求法 随所信乐说
比丘比丘尼 及清信士女
是四众普集 愿时为演说
有乐佛乘者 及缘觉声闻
佛知其深心 悉皆为断疑
不断佛种者 能出生三宝
为是诸菩萨 我今请法王
名称普流布 十方菩萨闻
皆悉共来集 为说无上道
此无上大法 二乘所不及
我等信力故 得入如是法
不可思议慧 非我等所及
佛虽无疲倦 我今²⁷有所请
悔过于世尊 愿说菩萨²⁸道

²⁶ 丽本：等人；永乐北藏本及龙藏本：人等

²⁷ 丽本：而我；永乐北藏本及龙藏本：我今

²⁸ 丽本：提；永乐北藏本及龙藏本：萨

四法品第二

尔时思益梵天说此偈已，白佛言：“世尊！何谓菩萨其心坚固而无疲倦？何谓菩萨所言决定而不中悔？何谓菩萨增长善根？何谓菩萨无所恐惧威仪不转²⁹？何谓菩萨成就白法？何谓菩萨善知从一地至一地？何谓菩萨于众生中善知方便？何谓菩萨善化众生？何谓菩萨世世不失菩提之心？何谓菩萨能一其心而无杂行？何谓菩萨善求法宝？何谓菩萨善出毁禁之罪？何谓菩萨善障烦恼？何谓菩萨善入诸大众？何谓菩萨善开法施？何谓菩萨得先因力不失善根？何谓菩萨不由他教而能自行六波罗蜜？何谓菩萨能转舍禅定还生欲界？何谓菩萨于诸佛法得不退转？何谓菩萨不断佛种？”

尔时，世尊赞思益梵天：“善哉！善哉！能问如来如此之事。汝今谛听，善思念之！”

“唯然，世尊！愿乐欲闻。”

佛告思益梵天：“菩萨有四法，坚固其心而不疲倦。何等为四³⁰？一者，于诸众生起大悲心；

²⁹ 丽本：动；永乐北藏本及龙藏本：转

³⁰ 丽本：四；永乐北藏本及龙藏本：为四

二者，精进不懈；三者，信解生死如梦；四者，正思惟³¹佛之智慧。菩萨有此四法，坚固其心而不疲倦。

“梵天，菩萨有四法，所言决定而不中悔。何等为四³²？一者，决定说诸法无我；二者，决定说诸生处无可乐者；三者，决定常赞大乘；四者，决定说罪福业不失。是为四。

“梵天，菩萨有四法增长善根。何等为四？一者，持戒；二者，多闻；三者，布施；四者，出家。是为四。

“梵天，菩萨有四法，无所恐畏威仪不转。何等为四³³？一者，失利；二者，恶名；三者，毁辱；四者，苦恼。是为四。

“梵天，菩萨有四法，成就白法。何等为四³⁴？一者，教人令信罪福；二者，布施不求果报；三者，守护正法；四者，以智慧教诸菩萨。是为四。

“梵天，菩萨有四法，善知从一地至一地。何等为四³⁵？一者，久植³⁶善根；二者，离诸过咎；

³¹ 丽本：量；永乐北藏本及龙藏本：惟

³² 丽本：四；永乐北藏本及龙藏本：为四

³³ 丽本：四；永乐北藏本及龙藏本：为四

³⁴ 丽本：四；永乐北藏本及龙藏本：为四

³⁵ 丽本：四；永乐北藏本及龙藏本：为四

³⁶ 丽本：殖；永乐北藏本及龙藏本：植

三者，善知方便回向；四者，勤行精进。是为四。

“梵天，菩萨有四法，于众生中善知³⁷方便。何等为四³⁸？一者，顺众生意；二者，于他功德起随喜心；三者，悔过除罪；四者，劝请诸佛。是为四。

“梵天，菩萨有四法善化众生。何等为四³⁹？一者，常求利益⁴⁰众生；二者，自舍己乐；三者，心和忍辱；四者，除舍憍慢。是为四。

“梵天，菩萨有四法，世世不失菩提之心。何等为四⁴¹？一者，常忆念佛；二者，所作功德常为菩提；三者，亲近善知识；四者，称扬大乘。是为四。

“梵天，菩萨有四法，能一其心而无杂行。何等为四⁴²？一者，离声闻心；二者，离辟支佛心；三者，求法无厌；四者，如所闻法广为人说。是为四。

“梵天，菩萨有四法，善求法宝。何等为四⁴³？一者，于法中生宝想，以难得故；二者，于

³⁷ 丽本：善知；永乐北藏本及龙藏本：于众生中善知

³⁸ 丽本：四；永乐北藏本及龙藏本：为四

³⁹ 丽本：四；永乐北藏本及龙藏本：为四

⁴⁰ 丽本：安；永乐北藏本及龙藏本：益

⁴¹ 丽本：四；永乐北藏本及龙藏本：为四

⁴² 丽本：四；永乐北藏本及龙藏本：为四

⁴³ 丽本：四；永乐北藏本及龙藏本：为四

法中生药想，疗众病故；三者，于法中生财利想，以不失故；四者，于法中生灭苦想⁴⁴，至涅槃故。是为四。

“梵天，菩萨有四法，善出毁禁之罪。何等为四⁴⁵？一者，得无生法忍，以诸法无来故；二者，得无灭法忍⁴⁶，以诸法无去故；三者，得因缘忍，知诸法因缘生故；四者，得无住忍，无异心相续故。是为四。

“梵天，菩萨有四法，善障烦恼。何等为四⁴⁷？一者，正忆念；二者，障诸根；三者，得善法力；四者，独处远离。是为四。

“梵天，菩萨有四法，善入诸大众。何等为四⁴⁸？一者，求法不求胜；二者，恭敬心无憍慢；三者，唯⁴⁹求法利，不自显现；四者，教人善法，不求名利。是为四。

“梵天，菩萨有四法，善开法施。何等为四⁵⁰？一者，守护于法；二者，自益智慧亦益他人；三者，行善人法；四者，示人垢净。是为四。

⁴⁴ 丽本：一切苦想；永乐北藏本及龙藏本：苦想

⁴⁵ 丽本：四；永乐北藏本及龙藏本：为四

⁴⁶ 丽本：忍；永乐北藏本及龙藏本：法忍

⁴⁷ 丽本：四；永乐北藏本及龙藏本：为四

⁴⁸ 丽本：四；永乐北藏本及龙藏本：为四

⁴⁹ 丽本：惟；永乐北藏本及龙藏本：唯

⁵⁰ 丽本：四；永乐北藏本及龙藏本：为四

“梵天，菩萨有四法得先因力不失善根，何等为四⁵¹？一者，见他人阙不以为过；二者，于瞋怒人常修慈心；三者，常说诸法因缘；四者，常念菩提。是为四。

“梵天，菩萨有四法，不由他教而能自行六波罗蜜。何等为四⁵²？一者，以施导人；二者，不说他人毁禁之罪；三者，善知摄法教化众生；四者，解达深法。是为四。

“梵天，菩萨有四法，能转舍禅定，还生欲界。何等为四⁵³？一者，其心柔软；二者，得诸善根⁵⁴力；三者，不舍一切众生；四者，善修智慧方便之力。是为四。

“梵天，菩萨有四法，于诸佛法得不退转。何等为四⁵⁵？一者，受无量生死；二者，供养无量诸佛；三者，修行无量慈心；四者，信解无量佛慧。是为四。

“梵天，菩萨有四法，不断佛种。何等为四⁵⁶？一者，不退本愿；二者，言必施行；三者，大欲精进；四者，深心行于佛道。是为菩萨有此

⁵¹ 丽本：四；永乐北藏本及龙藏本：为四

⁵² 丽本：四；永乐北藏本及龙藏本：为四

⁵³ 丽本：四；永乐北藏本及龙藏本：为四

⁵⁴ 丽本：根；永乐北藏本及龙藏本：善根

⁵⁵ 丽本：四；永乐北藏本及龙藏本：为四

⁵⁶ 丽本：四；永乐北藏本及龙藏本：为四

⁵⁷四法不断佛种。”

说是诸四法时，二万二千天子⁵⁸及人皆发阿耨多罗三藐三菩提心；五千人得无生法忍。十方诸来菩萨供养于佛，所散天华周遍三千大千世界，积至于膝。

菩萨正问品第三⁵⁹

尔时，网明菩萨问思益梵天言：“佛说：‘汝于正问菩萨中为最第一。’何谓菩萨所问为正问耶？”

梵天言：“网明，若菩萨以彼、我问，名为邪问；分别法问，名为邪问。若无彼、我问，名为正问；不分别法问，名为正问。

“又，网明，以生故问，名为邪问；以灭故问，名为邪问；以住故问，名为邪问。若不以生故问、不以灭故问、不以住故问，名为正问。

“又，网明，若菩萨为垢故问，名为邪问；为净故问，名为邪问；为生死故问，名为邪问；为出生死故问，名为邪问；为涅槃故问，名为邪问。若不为垢、净故问，不为生死、出生死故问，

⁵⁷ 丽本：有；永乐北藏本及龙藏本：有此

⁵⁸ 丽本：天；永乐北藏本及龙藏本：天子

⁵⁹ 丽本：分别品第三（丹本菩萨正问品第三）；永乐北藏本及龙藏本：菩萨正问品第三

不为涅槃故问，名为正问。所以者何？法位中无垢、无净、无生死⁶⁰、无涅槃。

“又，网明，若菩萨为见故问、为断故问、为证故问、为修故问、为得故问、为果故问，名为邪问。若无见、无断、无证、无修、无得、无果故问，名为正问。

“又，网明，是善、是不善故问⁶¹，名为邪问；是世间法、是出世间法，是罪法、是无罪法，是有漏法、是无漏法，是有为法、是无为法，如是等二法，随有⁶²所依而问者，名为邪问。若不见二、不见不二问，名为正问。

“又，网明，若菩萨分别佛问，名为邪问；分别法、分别僧、分别众生、分别佛国、分别诸乘问，名为邪问。若于法不作一、异问者，名为正问。

“又，网明，一切法正，一切法邪。”

网明言：“梵天，何谓一切法正？一切法邪？”

梵天言：“于诸法性无心故，一切法名为正；若于无心法中，以心分别观者，一切法名为邪。一切法离相名为正；若不信解是⁶³离相，是即分

⁶⁰ 丽本：无死；永乐北藏本及龙藏本：死

⁶¹ 丽本：善；永乐北藏本及龙藏本：善故问

⁶² 丽本：随；永乐北藏本及龙藏本：随有

⁶³ 丽本：达是；永乐北藏本及龙藏本：是

别诸法。若分别诸法，则入增上慢，随所分别，皆名为邪。”

网明言：“何谓为诸法正性？”

梵天言：“诸法离自性、离欲际，是名正性。”

网明言：“少有能解如是正性者⁶⁴。”

梵天言：“是正性不一不多。网明，若⁶⁵善男子、善女人能如是知诸法正性，若已知、若今知、若当知，是人无有法已得、无有法今得、无有法当得。所以者何？佛说无得、无分别，名为所作已办相；若人闻是诸法正性，勤行精进，是名如说修行，不从一地至一地。若不从一地至一地，是人不在生死、不在涅槃。所以者何？诸佛不得生死、不得涅槃。”

网明言：“佛不为度生死故说法耶？”

梵天言：“佛所示法有度生死耶？”

网明言：“无也。”

梵天言：“以是因缘当知佛不令众生出生死、入涅槃，但为度妄想分别生死、涅槃二相者耳！此中实无度生死至涅槃者。所以者何？诸法平等，无有往来、无出生死、无入涅槃。”

⁶⁴ 丽本：性；永乐北藏本及龙藏本：性者

⁶⁵ 丽本：若有；永乐北藏本及龙藏本：若

尔时，世尊赞思益梵天言：“善哉！善哉！说诸法正性，应如汝所说。”说是法时，二千比丘不受诸法，漏尽，心得解脱。

佛告梵天：“我不得生死，不得涅槃。如来虽说生死，实无有人往来生死；虽说涅槃，实无有人得灭度者。若有入此法门⁶⁶，是人非生死相、非灭度相。”

尔时，会中五百比丘从坐而起，作是言：“我等空修梵行，今实见有灭度者，而言无有灭度。我等何用修道求智慧为？”

尔时，网明菩萨白佛言：“世尊！若有于法生见，则于其人，佛不出世。世尊！若有决定见涅槃者，是人不得生死。所以者何？涅槃名为除灭诸相，远离一切动念戏论。世尊！是诸比丘于佛正法出家，而今随⁶⁷于外道邪见，见涅槃决定相，譬如从麻出油、从酪出酥。世尊！若人于诸法灭相中求涅槃者，我说是辈皆为增上慢人。世尊！正行道者，于法不作生、不作灭、无得无果。”

网明谓梵天言：“是五百比丘从坐起者，汝当为作方便，引导其心入此法门，令得信解离诸

⁶⁶ 丽本：法门者；永乐北藏本及龙藏本：法门

⁶⁷ 丽本：堕；永乐北藏本及龙藏本：随

邪见！”

梵天言：“善男子，纵使令去至恒河沙劫，不能得出如此法门。譬如痴人畏于虚空，舍空而走，在所至处不离虚空；此诸比丘亦复如是，虽复远去，不出空相、不出无相相、不出无作相。又如一人求索虚空，东西驰走言：‘我欲得空，我欲得空。’是人但说虚空名字而不得空，于空中行而不见空。此诸比丘亦复如是，欲求涅槃，行涅槃中而不得涅槃。所以者何？涅槃者但有名字。犹如虚空但有名字，不可得取；涅槃亦复如是，但有名字而不可得。”

尔时，五百比丘闻说是法，不受诸法，漏尽，心得解脱，得阿罗汉道，作是言：“世尊！若人于诸法毕竟灭相中求涅槃者，则于其人佛不出世。世尊！我等今者非凡夫、非学、非无学、不在生死、不在涅槃。所以者何？佛出世故，名为远离一切动念戏论。”

尔时，长老舍利弗谓诸比丘：“汝今得正智，为己利耶？”

五百比丘言：“长老舍利弗！我等今者得诸烦恼，不可作而作。”

舍利弗言：“何故说此？”

诸比丘言：“知诸烦恼实相，故言得诸烦恼；涅槃是无作性，我等已证，故说不可作而作。”

舍利弗言：“善哉！善哉！汝等今者住于福田，能消供养。”

诸比丘言：“大师！世尊尚不能消诸供养，何况我等？”

舍利弗言：“何故说此？”

诸比丘言：“世尊知见法性，性常净故。”

于是思益梵天白佛言：“世尊！谁应受供养？”

佛告梵天：“不为世法之所牵者。”

“世尊！谁能消供养？”

佛言：“于法无所取者。”

“世尊！谁为世间福田？”

佛言：“不坏菩提性者。”

“世尊！谁为众生善知识？”

佛言：“于一切众生不舍慈心者。”

“世尊！谁知报佛恩？”

佛言：“不断佛种者。”

“世尊！谁能供养佛？”

佛言：“能通达无生际者。”

“世尊！谁能亲⁶⁸近于佛？”

⁶⁸ 丽本：近；永乐北藏本及龙藏本：近于

佛言：“乃至失命因缘不毁禁者。”

“世尊！谁能恭敬于佛？”

佛言：“善覆六根者。”

“世尊！谁名财富？”

佛言：“成就七财者。”

“世尊！谁名知足？”

佛言：“得出世间智慧者。”

“世尊！谁为远离？”

佛言：“于三界中无所愿者。”

“世尊！谁为具足？”

佛言：“能断一切诸结使者。”

“世尊！谁为乐人？”

佛言：“无贪著者。”

“世尊！谁无贪著？”

佛言：“知见五阴者。”

“世尊！谁度欲河？”

佛言：“能舍六入者。”

“世尊！谁住彼岸？”

佛言：“能知诸道平等者。”

“世尊！何谓菩萨能为施主？”

佛言：“菩萨能教众生一切智心。”

“世尊！何谓菩萨能奉禁戒？”

佛言：“常能不舍菩提之心。”

“世尊！何谓菩萨能行忍辱？”

佛言：“见心相念念灭。”

“世尊！何谓菩萨能行精进？”

佛言：“求心不⁶⁹得。”

“世尊！何谓菩萨能行禅定？”

佛言：“除⁷⁰身心粗相。”

“世尊！何谓菩萨能行智慧？”

佛言：“于一切法无有戏论。”

“世尊！何谓菩萨能行慈心？”

佛言：“不生众生想。”

“世尊！何谓菩萨能行悲心？”

佛言：“不生法想。”

“世尊！何谓菩萨能行喜心？”

佛言：“不生我想。”

“世尊！何谓菩萨能行舍心？”

佛言：“不生彼我想。”

“世尊！何谓菩萨安住于信？”

佛言：“信解心净无⁷¹浊法。”

“世尊！何谓菩萨安住于空？”

⁶⁹ 丽本：不可；永乐北藏本及龙藏本：不

⁷⁰ 丽本：能除；永乐北藏本及龙藏本：除

⁷¹ 丽本：无浊法；永乐北藏本及龙藏本：心净无浊法

佛言：“不著一切语言。”

“世尊！何谓菩萨名为有惭？”

佛言：“知见内法。”

“世尊！何谓菩萨名为有愧？”

佛言：“舍于外法。”

“世尊！何谓名为菩萨遍行？”

佛言：“能净身口意业。”

尔时，世尊而说偈言：

若身净无恶	口净常实语
心净常行慈	是菩萨遍行
行慈无贪著	观不净无恚
行舍而不痴	是菩萨遍行
若在空聚野 ⁷²	及与处大众
威仪终不转 ⁷³	是菩萨遍行
知法名为佛	知离名为法
知无名为僧	是菩萨遍行
知多欲所行	知恚痴所行
善知转此行	是菩萨遍行
不依止欲界	不住色无色
行如是禅定	是菩萨遍行

⁷² 丽本：若聚若空野；永乐北藏本及龙藏本：若在空聚野

⁷³ 丽本：缺；永乐北藏本及龙藏本：转

信解诸法空 及无相无作
而不尽诸漏 是菩萨遍行
善知声闻乘 及辟支佛乘
通达于佛乘 是菩萨遍行
明解于诸法 不疑道非道
憎爱心无异 是菩萨遍行
于过去未来 及与现在世
一切无分别 是菩萨遍行⁷⁴

尔时，思益梵天白佛言：“世尊！何谓菩萨过世间法？通达世间法？通达世间法已，度众生？于世间法行于世间，不⁷⁵坏世间？”

尔时，世尊以偈答言：

说五阴是世 世间所依止
依止于五阴 不脱世间法
菩萨有智慧 知世间实相
所谓五阴如 世间法不染
利衰及毁誉 称讥与苦乐
如此之八法 常牵于世间
大智慧菩萨 散灭世间法
见世坏败相 处之而不动

⁷⁴ 丽本：行（此下丹本为菩萨出过世间品第四）；永乐北藏本及龙藏本：行

⁷⁵ 丽本：而不；永乐北藏本及龙藏本：不

得利心不高 失利心不下
其心坚不动 譬如须弥山
利衰及毁誉 称讥与苦乐
于此世八法 其心常平等
知世间虚妄 皆从颠倒起
如是之人等 不行世间道
世间所有道 菩萨皆识知
故能于世间 度众生苦恼
虽行于世间 如莲华不染
亦不坏世间 通达法性故
世间行世间 不知是世间
菩萨行世间 明了世间相
世间虚空相 虚空亦无相
菩萨知如是 不染于世间
如所知世间 随知而演说
知世间性故 亦不坏世间
五阴无自性 是即世间性
若人不知是 常住于世间
若见知五阴 无生亦无灭
是人行世间⁷⁶ 而不依世间
凡夫不知法 于世起诤讼

⁷⁶ 丽本：现行世；永乐北藏本及龙藏本：行世间

是实是不实 住是二相中
我常不与世 起于诤讼事
世间之实相 悉以⁷⁷了知故
诸佛所说法 皆悉无诤讼
知世平等故 非实非虚妄
若佛法决定 有实有虚妄
是即为贪著 与外道无异
而今⁷⁸实义中 无实无虚妄
是故我常说 出世法无二
若人知世间 如是之实性
于实于虚妄 不取此恶见
如是知世间 清净如虚空
是大名称人 照世间如日
若人见世间 如我之所见
如斯之人等 能见十方佛
诸法从缘生 自无有定性
若知此因缘 则达法实相
若知法实相 是则知空相
若能知空相 则为见导师
若有人得闻 如是世间相

⁷⁷ 丽本：已；永乐北藏本及龙藏本：以

⁷⁸ 丽本：今；永乐北藏本及龙藏本：令；校勘：今

虽行于世间 而不住世间
依止诸见人 不能及此事
云何行世间 而不住⁷⁹世间
若佛灭度后 有乐是法者
佛则于其人 常现于法身
若人解达此 则守护我法
亦为供养我 亦是世导师
若人须臾闻 世间性如此
是人终不为 恶魔所得便
若能达此义 则为大智慧
法财之施主 亦是具禁戒
若知世如此 忍辱力勇健
具足诸禅定 通达于智慧
所在闻是法 其方则有佛
如是诸菩萨 不久坐道场
若有深爱乐 如是世间性⁸⁰
则能降众魔 疾得无上道

⁷⁹ 丽本：依；永乐北藏本及龙藏本：住

⁸⁰ 丽本：法；永乐北藏本及龙藏本：性

四谛品第四⁸¹

佛复告思益梵天：“如来出过世间，亦说世间苦、世间集、世间灭、世间灭道。五阴⁸²名为世间⁸³，贪著五阴名为世间集，五阴尽名为世间灭，以无二法求五阴名为世间灭道。又，梵天，所言五阴但有言说，于中取相分别生见，而说是名世间⁸⁴；不舍是见是名世间集；是见自相是名世间灭；随以何道不取是见是名世间灭道。梵天，以是因缘故，我为外道仙人说言：‘仙人，于汝身中即说世间苦、世间集、世间灭、世间灭道。’”

尔时，思益梵天白佛言：“世尊！所说四圣谛，何等是真圣谛？”

“梵天，苦不名为圣谛，苦集不名为圣谛，苦灭不名为圣谛，苦灭道不名为圣谛。所以者何？若苦是圣谛者，一切牛、驴畜生等，皆应有苦圣谛。若集是圣谛者，一切在所生处众生，皆应有集圣谛。所以者何？以集故生诸趣中。若苦灭是圣谛者，观灭者、说断灭者，皆应有灭圣谛。若

⁸¹ 丽本：解诸法品第四（此品名丹本无下二十四幅尔时下方为叹功德品第五）；永乐北藏本及龙藏本：四谛品第四

⁸² 丽本：梵天，五阴；永乐北藏本及龙藏本：五阴

⁸³ 丽本：世间苦；永乐北藏本及龙藏本：世间

⁸⁴ 丽本：世间苦；永乐北藏本及龙藏本：世间

道是圣谛者，缘一切有为道者皆应有道圣谛。梵天，以是因缘故，当知圣谛非苦、非集、非灭、非道。圣谛者，知苦无生是名苦圣谛；知集无和合是名集圣谛；于毕竟灭法中，知无生无灭是名灭圣谛；于一切法平等，以不二法得道是名道圣谛。

“梵天，真圣谛者无有虚妄。虚妄者，所谓：著我、著众生、著人、著寿命者、著养育者、著有著无、著生著灭、著生死、著涅槃。梵天，若行者言：‘我知见苦。’是虚妄；‘我断集。’是虚妄；‘我灭证⁸⁵。’是虚妄；‘我修道。’是虚妄。所以者何？是人⁸⁶失佛所护念，是故说为虚妄。何等是佛所护念？谓不忆念一切诸法，是名佛所护念⁸⁷。若行者住是念中，则不住一切相；若不住一切相，则住实际；若住实际，是名不住心；若不住心，是人名为非实语⁸⁸、非妄语者。梵天，是故当知，若非实、非虚妄者，是名圣谛。梵天，实者终不作不实，若有佛、若无佛，法性常住，所谓生死性、涅槃性是性常实⁸⁹。所以者何？非

⁸⁵ 丽本：证灭；永乐北藏本及龙藏本：灭证

⁸⁶ 丽本：违；永乐北藏本及龙藏本：遗

⁸⁷ 丽本：诸法；永乐北藏本及龙藏本：诸法，是名佛所护念

⁸⁸ 丽本：实语者；永乐北藏本及龙藏本：非实语

⁸⁹ 丽本：常实；永乐北藏本及龙藏本：是性常实

离生死得涅槃，名为圣谛。若人证如是四谛，是名世间实语者。

“梵天，当来有比丘不修身、不修戒、不修心、不修慧，是人说生⁹⁰相是苦谛、众缘和合是集谛、灭法是⁹¹灭谛、以二法求相是道谛。”

佛言：“我说此愚人是外道徒党，我非彼人师，彼非我弟子，是人堕于邪道，破失法故，说言有谛。梵天，且⁹²观我坐道场时不得一法，是实是虚妄？若我不得法，是法宁可于众中有言说、有论议、有教化耶？”

梵天言：“不也。世尊！”

“梵天，以诸法无所得故，诸法离自性故，我菩提是无贪爱相。”

叹功德品第五⁹³

尔时，思益梵天白佛言：“世尊！若如来于法无所得者，有何利益说：‘如来得菩提名为佛。’？”

佛言：“梵天，于汝意云何？我所说法，若有为、若无为，是法为实？为虚妄耶？”

⁹⁰ 丽本：生死；永乐北藏本及龙藏本：生

⁹¹ 丽本：故是；永乐北藏本及龙藏本：是

⁹² 丽本：汝且；永乐北藏本及龙藏本：且

⁹³ 丽本：此处不分品，仍为四谛品第四

梵天言：“是法虚妄，非实。”

“于汝意云何？若法虚妄非实，是法为有？为无？”

梵天言：“世尊！若法虚妄，是法不应说有、不应说无。”

“于汝意云何？若法非有、非无，是法有得者不？”

梵天言：“无有得者。”

“梵天，如来坐道场时，唯⁹⁴得虚妄颠倒所起烦恼毕竟空性。以无所得故得，以无所知故知。所以者何？我所得法，不可见不可闻、不可觉不可识、不可取不可著、不可说不可难；出过一切法相，无语、无说、无有文字、无言说道。梵天，此法如是，犹如虚空。汝欲于如是法中得利益耶？”

梵天言：“不也。世尊！诸佛、如来甚为希有，成就未曾有法，深入大慈大悲，得如是寂灭相法，而以文字言说教人令得。世尊！其有闻是能信解者，当知是人从小功德来。世尊！是法一切世间之所难信。所以者何？世间贪著实，而是法无实、无虚妄；世间贪著法，而是法无法、

⁹⁴ 丽本：唯；永乐北藏本及龙藏本：惟

无非法；世间贪著涅槃，而是法无生死、无涅槃；世间贪著善法，而是法无善、无非善；世间贪著乐，而是法无苦、无乐；世间贪著佛出世，而是法无佛出世亦无涅槃；虽有说法，而是法非可说相；虽赞说僧，而僧即是无为。是故此法一切世间之所难信。譬如水中出火、火中出水，难可得信；如是烦恼中有菩提，菩提中有烦恼，是亦难信。所以者何？如来得是虚妄烦恼之性，亦⁹⁵无法不得，有所说法亦无有形，虽有所知亦无分别，证⁹⁶涅槃亦无灭者。

“世尊！若有善男子、善女人，能信解如是法义者；当知是人得脱诸见；当知是人已亲近无量诸佛；当知是人已供养无量诸佛；当知是人为善知识所护；当知是人志意旷大；当知是人善根深厚；当知是人守护诸佛法藏；当知是人能善思量，起于善业；当知是人种姓尊贵，生如来家；当知是人能行大舍，舍诸烦恼；当知是人得持戒力，非烦恼力；当知是人得忍辱力，非瞋恚力；当知是人得精进力，无有疲懈；当知是人得禅定力，灭诸恶心；当知是人得智慧力，离恶邪见；

⁹⁵ 丽本：而；永乐北藏本及龙藏本：亦

⁹⁶ 丽本：虽证；永乐北藏本及龙藏本：证

当知是人一切恶魔不能得便；当知是人一切怨贼所不能破；当知是人不诳世间；当知是人是真语者，善说法相故；当知是人实语者，说第一义故；当知是人善为诸佛之所护念；当知是人柔和软善，同止安乐；当知是人名为大富，有圣财故；当知是人常能知足，行圣种故；当知是人易满易养，离贪著故；当知是人得安隐心，到彼岸故；当知是人度未度者；当知是人解未解者；当知是人安未安者；当知是人灭未灭者；当知是人能示正道；当知是人能说解脱；当知是人为大医王，善知诸药；当知是人犹如良药，善疗众病；当知是人智慧勇健；当知是人为有大力，坚固究竟；当知是人有精进力，不随他语；当知是人为如狮子，无所怖畏；当知是人为如象王，其心调柔；当知是人为如老象，其心随顺；当知是人为如牛王，能导大众；当知是人为大勇健，能破魔怨；当知是人为大丈夫，处众无畏；当知是人无所忌难，得无畏法故；当知是人无所畏难，说真谛法故；当知是人具清白法如月盛满；当知是人智慧光照犹如日月⁹⁷；当知是人除诸暗冥犹如执炬；当知是人乐行舍心，离诸憎爱；当知是人载育众

⁹⁷ 丽本：明；永乐北藏本及龙藏本：月

生犹如地；当知是人洗诸尘垢犹如水；当知是人烧诸动念犹如火；当知是人于法无障犹如风；当知是人其心不动如须弥；当知是人其心坚固如金刚山；当知是人一切外道竞胜论者所不能动；当知是人一切声闻、辟支佛所不能测；当知是人多饶法宝犹如大海；当知是人烦恼不现如波陀罗；当知是人求法无厌；当知是人以智慧知足；当知是人能转法轮如转轮王；当知是人身色殊妙如天帝释；当知是人心得自在如梵天王；当知是人说法音声犹如雷震；当知是人降法甘露犹如时雨；当知是人能增长无漏根、力、觉分⁹⁸；当知是人已度生死污泥；当知是人入佛智慧；当知是人近佛菩提；当知是人能多学问无与等者；当知是人无有量已过量；当知是人智慧辩才无有障碍；当知是人⁹⁹忆念坚固得陀罗尼；当知是人知诸众生深心所行；当知是人得智慧力，正观诸法解达义趣；当知是人勤行精进，利安世间；当知是人超出于世；当知是人不可污染犹如莲华；当知是人不为世法所覆；当知是人利根者所爱；当知是人多闻者所敬；当知是人智者所念；当知是人天人

⁹⁸ 丽本：觉分；永乐北藏本及龙藏本：觉分；当知是人能转法轮如转轮王；校勘：觉分

⁹⁹ 丽本：人得；永乐北藏本及龙藏本：人

¹⁰⁰供养；当知是人为坐禅者所礼¹⁰¹；当知是人善人所贵；当知是人声闻、辟支佛之所贪慕；当知是人不贪小行；当知是人不覆藏罪、不显功德；当知是人威仪备具生他净心；当知是人身色端正见者悦乐；当知是人有大威德众所宗仰；当知是人以三十二相庄严其身；当知是人能继佛种；当知是人能护法宝；当知是人能供养僧；当知是人诸佛所见；当知是人为得法眼；当知是人以佛智慧而得受记；当知是人具足三忍；当知是人安住道场；当知是人破坏魔军；当知是人得一切种智；当知是人转于法轮；当知是人作无量佛事。

“若人信解如是法义不惊疑怖畏者，得如是功德，是人于诸佛阿耨多罗三藐三菩提甚深难解、难知、难信、难入，而能信受、读诵、通利、奉持，为人广说，如说修行，亦教他人如说修行。如是之人，我以一劫若减一劫说其功德，犹不能尽。”

思益梵天所问经卷第一

¹⁰⁰ 丽本：人天；永乐北藏本及龙藏本：天人

¹⁰¹ 丽本：之所敬礼；永乐北藏本及龙藏本：所礼

思益梵天所问经卷第二

姚秦三藏法师鸠摩罗什译¹⁰²

如来五力说品第六¹⁰³

佛告梵天：“汝何能称说是人功德？如如来以无¹⁰⁴智慧之所知乎，是人所有功德复过于此。若人能于如来所说文字、¹⁰⁵语言、章句，通达随顺、不违不逆、和合为一，随其义理，不随章句言辞，而善知言辞所应之相；知如来以何¹⁰⁶说法、以何随宜说法、以何方便说法、以何法门说法、以何大悲说法。梵天，若菩萨能知如来以是五力说法，是菩萨能作佛事。”

梵天言：“何谓如来所用五力？”

佛言：“一者，¹⁰⁷言说；二者，随宜；三者，方便；四者，法门；五者，大悲。是名如来所用五力，一切声闻、辟支佛所不能及。”

“世尊！云何名为¹⁰⁸说？”

¹⁰² 丽本：姚秦龟兹国三藏鸠摩罗什译

¹⁰³ 丽本：解诸法品第四之余（丹如来五力说品第六五幅世尊何谓大悲下为如来大悲品第七）；永乐北藏本及龙藏本：如来五力说品第六

¹⁰⁴ 丽本：导；永乐北藏本及龙藏本：阂

¹⁰⁵ 丽本：言说；永乐北藏本及龙藏本：语言

¹⁰⁶ 丽本：语；永乐北藏本及龙藏本：言

¹⁰⁷ 丽本：语；永乐北藏本及龙藏本：言

¹⁰⁸ 丽本：何谓为说法；永乐北藏本及龙藏本：云何名为说

佛言：“梵天，如来说过去法，说未来、现在法，说垢净法，说世间、出世间法，说有罪、无罪法，说有漏、无漏法，说有为、无为法，说我、人、众生、寿命者¹⁰⁹法，说得证法，说生死、涅槃法。梵天，当知是¹¹⁰言说，如幻人说，无决定故；如梦中说，虚妄见故；如响声说，从空出故；说如影，众缘和合¹¹¹故；说如镜中像，因不入镜故；说如野马，颠倒见故；说如虚空，无生灭故。当知是说为无所说，诸法相不可说故。梵天，若菩萨能知此诸言说¹¹²者，虽有一切言说，而于诸法无所贪著；以无¹¹³贪著故得无碍辩才；以是辩才，若恒河沙劫说法无尽无碍，诸有言说不坏法性，亦复不著不坏法性。梵天，是名如来言说¹¹⁴。”

梵天言：“何谓如来¹¹⁵随宜？”

佛言：“如来或垢法说净，净法说垢。菩萨于此应知如来随宜所说。梵天，何谓如来¹¹⁶垢法说净？不得垢法性故。何谓净法说垢？贪著净法

¹⁰⁹ 丽本：命；永乐北藏本及龙藏本：命者

¹¹⁰ 丽本：是诸；永乐北藏本及龙藏本：是

¹¹¹ 丽本：合；永乐北藏本及龙藏本：和合

¹¹² 丽本：说；永乐北藏本及龙藏本：言说

¹¹³ 丽本：不；永乐北藏本及龙藏本：无

¹¹⁴ 丽本：说也；永乐北藏本及龙藏本：言说

¹¹⁵ 丽本：世尊！何谓；永乐北藏本及龙藏本：何谓如来

¹¹⁶ 丽本：谓；永乐北藏本及龙藏本：谓如来

故。又，梵天，我说布施即是涅槃，凡夫¹¹⁷无智不能善知¹¹⁸随宜所说。菩萨应如是思量：‘布施后得大富，此中无法可¹¹⁹从一念至一念，若不从一念至一念即是诸法实相，诸法实相即是涅槃。’持戒是涅槃，不作不起故；忍辱是涅槃，念念灭故；精进是涅槃，无所取故；禅定是涅槃，不贪味故；智慧是涅槃，不得相故；淫¹²⁰欲是实际，法性无欲故；瞋恚是实际，法性无瞋故；愚痴是实际，法性无痴故；生死是涅槃，无退无生故；涅槃是生死，以贪著故；实语是虚妄，生语见故；虚妄是实语，为增上慢人故。

“又，梵天，如来以随宜故，或自说我，是¹²¹常边者；或自说我，是¹²²断边者；或自说我，是¹²³无作者；或自说我，是邪见者；或自说我，是不信者；或自说我，是不知报恩者；或自说我，是食吐者；或自说我，是不受者。如来无有如是诸事而有此说¹²⁴，当知是为随宜所说，欲令众生舍增上慢故。若菩萨善通达如来随宜所说¹²⁵者，

¹¹⁷ 丽本：人；永乐北藏本及龙藏本：夫

¹¹⁸ 丽本：解；永乐北藏本及龙藏本：知

¹¹⁹ 丽本：可得；永乐北藏本及龙藏本：可

¹²⁰ 丽本：贪；永乐北藏本及龙藏本：淫

¹²¹ 丽本：是说；永乐北藏本及龙藏本：是

¹²² 丽本：是说；永乐北藏本及龙藏本：是

¹²³ 丽本：是说；永乐北藏本及龙藏本：是

¹²⁴ 丽本：如此诸事；永乐北藏本及龙藏本：如是诸事而有此说

¹²⁵ 丽本：说；永乐北藏本及龙藏本：所说

若闻佛出则便信受，示众生善业色身果报故；若闻佛不出亦信受，诸佛¹²⁶法性身故；若闻佛说法亦信受，为喜乐文字众生故；若闻佛不说法亦信受，诸法¹²⁷位性以不¹²⁸可说故；若闻有涅槃亦信受，灭颠倒所起烦恼故；若闻无涅槃亦信受，诸法无生相无¹²⁹灭相故；若闻有众生亦信受，入世谛门故；若闻无众生亦信受，入第一义故。梵天，菩萨如是善知如来随宜所说，于诸音声无疑无畏，亦能利益无量众生。”

“世尊！何谓方便？”

佛言：“如来为众生说布施得大富，持戒得生天，忍辱得端正，精进得具诸功德，禅定得法喜，智慧得舍诸烦恼，多闻得智慧故，行十善道得人天福乐故，慈悲喜舍得生梵世故，禅定得如实智慧故，智慧¹³⁰得道果故，学地得无学地故，辟支佛地得消诸供养故，佛地得无量智慧故，涅槃灭¹³¹一切烦¹³²恼故。梵天，我如是方便为众生赞说是法。如来实不得我、人、众生、寿命者，

¹²⁶ 丽本：知是诸佛；永乐北藏本及龙藏本：诸佛

¹²⁷ 丽本：知诸法；永乐北藏本及龙藏本：诸法

¹²⁸ 丽本：不；永乐北藏本及龙藏本：以不

¹²⁹ 丽本：生；永乐北藏本及龙藏本：生相无

¹³⁰ 丽本：如实智慧；永乐北藏本及龙藏本：智慧

¹³¹ 丽本：得灭；永乐北藏本及龙藏本：灭

¹³² 丽本：苦；永乐北藏本及龙藏本：烦

亦不得施、亦不得悭，亦不得戒、亦不得毁戒，亦不得忍辱、亦不得瞋恚，亦不得精进、亦不得懈怠，亦不得禅定、亦不得乱心，亦不得智慧、亦不得智慧果，亦不得菩提、亦不得涅槃，亦不得苦、亦不得乐。梵天，若众生闻是法者勤行精进，是人为何利故勤行精进不得是法？若须陀洹果、斯陀含果、阿那含果、阿罗汉果、辟支佛道、阿耨多罗三藐三菩提乃至无余涅槃¹³³亦复不得。梵天，是名如来方便说也¹³⁴。菩萨于此方便¹³⁵应勤精进，令诸众生得于法利。”

“世尊！何谓如来法门？”

佛言：“眼是解脱门，耳、鼻、舌、身、意是解脱门。所以者何？眼空，无我、无我所，性自尔；耳、鼻、舌、身、意空，无我、无我所，性自尔。梵天，当知六¹³⁶入，皆是¹³⁷解脱门，正行则不虚诳故；色、声、香、味、触、法亦复¹³⁸；一切诸法皆入是门，所谓空门、无相门、无作门、无生门、无灭门、无所从来门、无所从去门、无退门、无起门、性常清净门、离自体门。又，梵

¹³³ 丽本：涅槃；永乐北藏本及龙藏本：无余涅槃

¹³⁴ 丽本：法；永乐北藏本及龙藏本：也

¹³⁵ 丽本：方便说法中；永乐北藏本及龙藏本：方便

¹³⁶ 丽本：诸；永乐北藏本及龙藏本：六

¹³⁷ 丽本：入此；永乐北藏本及龙藏本：是

¹³⁸ 丽本：亦复如是；永乐北藏本及龙藏本：亦复

天，如来于一切文字¹³⁹示是解脱门。所以者何？诸文字无合无用¹⁴⁰。梵天，当知如来于一切文字中说圣谛、说解脱门，如来所说法无有垢，一切诸法皆入解脱令住涅槃，是名如来说法入于法门。菩萨于此法门应当修学。”

如来大悲品第七¹⁴¹

“世尊！何谓大悲？”

佛言：“如来以三十二种大悲救护众生。何等三十二？一切诸法¹⁴²无我，而众生不信不解¹⁴³，如来于此而起大悲。一切诸法无众生，而众生说有众生，如来于此而起大悲。一切法无寿命者，而众生说有寿命者，如来于此而起大悲。一切法无人，而众生说有人，如来于此而起大悲。一切法无所有，而众生住于有见，如来于此而起大悲。一切法无住，而众生有住，如来于此而起大悲。一切法无归处，而众生乐于归处，如来于此而起大悲。一切法非我所，而众生著于我所，如来于此而起大悲。一切法无所属，而众生计有所属，

¹³⁹ 丽本：字中；永乐北藏本及龙藏本：字

¹⁴⁰ 丽本：用，性钝故；永乐北藏本及龙藏本：用

¹⁴¹ 丽本：（此处不分品）；永乐北藏本及龙藏本：如来大悲品第七

¹⁴² 丽本：法；永乐北藏本及龙藏本：诸法

¹⁴³ 丽本：解，说有我生；永乐北藏本及龙藏本：解

如来于此而起大悲。一切法无取相，而众生有取相，如来于此而起大悲。一切法无生，而众生住于有生，如来于此而起大悲。一切法无退生，而众生住于退生，如来于此而起大悲。一切法无垢，而众生著垢，如来于此而起大悲。一切法离染，而众生有染，如来于此而起大悲。一切法离瞋，而众生有瞋，如来于此而起大悲。一切法离痴，而众生有痴，如来于此而起大悲。一切法无所从来，而众生著有所来¹⁴⁴，如来于此而起大悲。一切法无所去，而众生著于后生¹⁴⁵，如来于此而起大悲。一切法无起，而众生计有所起，如来于此而起大悲。一切法无戏论，而众生著于戏论，如来于此而起大悲。一切法空而众生堕于有见，如来于此而起大悲。一切法无相，而众生著于有相，如来于此而起大悲。一切法无作，而众生著于有作，如来于此而起大悲。世间常共瞋恚¹⁴⁶诤竞，如来于此而起大悲。世间邪见颠倒行于邪道，欲令住于正道，如来于此而起大悲。世间饕餮无有厌足，互相陵¹⁴⁷夺，欲令众生住于圣财信、戒、闻、施、慧等，如来于此而起大悲。众生是产业、

¹⁴⁴ 丽本：从来；永乐北藏本及龙藏本：来

¹⁴⁵ 丽本：有去；永乐北藏本及龙藏本：后生

¹⁴⁶ 丽本：恨；永乐北藏本及龙藏本：恚

¹⁴⁷ 丽本：数；永乐北藏本及龙藏本：陵

妻子、恩爱之仆，于此危脆之物生坚固想，欲令众生悉知¹⁴⁸无常，如来于此而起大悲。众生身为怨贼，贪著养育以为亲友，欲为众生作真知识，令毕众苦究竟涅槃，如来于此而起大悲。众生好行欺诳，邪命自活，欲令众生¹⁴⁹行于正命，如来于此而起大悲。众生乐著众苦不净居家，欲令众生¹⁵⁰出于三界，如来于此而起大悲。一切诸法从因缘有，而众生于圣解脱而生¹⁵¹懈怠，我当为说¹⁵²精进令乐解脱，如来于此而起大悲。众生舍弃最上无碍智慧，求于声闻辟支佛道，我当引导¹⁵³令发大心缘于佛法，如来于此而起大悲。梵天，如来如是于诸众生行此三十二种大悲，是故如来名为行大悲者。若菩萨于众生中常能修集此大悲心，则为阿鞞跋致¹⁵⁴，为大福田威德具足，常能利益一切众生。”

说是大悲法门品时，三万二千人皆发阿耨多罗三藐三菩提心，八千菩萨得无生法忍。

¹⁴⁸ 丽本：知悉；永乐北藏本及龙藏本：悉知

¹⁴⁹ 丽本：令；永乐北藏本及龙藏本：令众生

¹⁵⁰ 丽本：令；永乐北藏本及龙藏本：令众生

¹⁵¹ 丽本：生于；永乐北藏本及龙藏本：而生

¹⁵² 丽本：欲说；永乐北藏本及龙藏本：我当为说

¹⁵³ 丽本：欲引导之；永乐北藏本及龙藏本：我当引导

¹⁵⁴ 丽本：入阿惟越致；永乐北藏本及龙藏本：阿鞞跋致

幻化品第八¹⁵⁵

尔时，网明菩萨摩诃萨白佛言：“世尊！是思益梵天云何闻¹⁵⁶大悲法¹⁵⁷而不喜悦？”

思益¹⁵⁸言：“善男子，若识在二法则有喜悦，若识在无二实际法中则无喜悦。譬如幻人见幻戏事无所喜悦，菩萨知诸法相如是，则于如来若说法、若神通亦无喜悦。又，善男子，如佛所化人闻佛说法不喜不悦，菩萨知诸法相与化无异，于如来所不加喜悦¹⁵⁹，于余¹⁶⁰众生无下劣想。”

网明言：“梵天，汝今见诸法如幻相耶？”

梵天言：“若人分别诸法者，汝当问之！”

网明言：“汝今于何处行？”

梵天言：“一切凡夫行¹⁶¹处，吾于彼行。”

网明言：“凡夫人行贪欲、瞋恚、愚痴、身见、疑网，行我¹⁶²、我所等邪道，汝于是处行耶？”

梵天言：“善男子，汝欲得凡夫法决定相耶？”

网明言：“我尚不欲决定得凡夫，何况凡夫

¹⁵⁵ 丽本：难问品第五（丹幻化品第八）；永乐北藏本及龙藏本：幻化品第八

¹⁵⁶ 丽本：闻是；永乐北藏本及龙藏本：闻

¹⁵⁷ 丽本：法门；永乐北藏本及龙藏本：法

¹⁵⁸ 丽本：梵天；永乐北藏本及龙藏本：思益

¹⁵⁹ 丽本：悦；永乐北藏本：悦；龙藏本：说；校勘：悦

¹⁶⁰ 丽本：诸；永乐北藏本及龙藏本：余

¹⁶¹ 丽本：所行；永乐北藏本及龙藏本：行

¹⁶² 丽本：我；永乐北藏本及龙藏本：行我

法？”

“善男子，若是法无决定者，宁有贪欲、瞋恚、愚痴法耶？”

网明言：“无也。”

“善男子，一切法离贪瞋¹⁶³痴相，行相亦如是。善男子，凡夫行、贤圣行皆无二、无差别。善男子，一切行非行，一切说非说，一切道非道。”

网明言：“何谓一切行非行？”

梵天言：“善男子，若人千万亿劫行道，于法性不增不减，是故言一切行非行。”

“何谓一切说非说？”

梵天言：“善男子，如来以不可¹⁶⁴说相说一切法，是故言一切说非说。”

“何谓一切道非道？”

梵天言：“以无所至故，一切道非道。”

尔时，世尊赞思益梵天言：“善哉！善哉！说诸法相应当如是。”

网明菩萨谓梵天言：“汝说‘一切凡夫行处，吾于彼行’者，则有行相！”

梵天言：“若我有所生处，应有行相。”

¹⁶³ 丽本：恚；永乐北藏本及龙藏本：瞋

¹⁶⁴ 丽本：不；永乐北藏本及龙藏本：不可

网明言：“汝若不生，云何教化众生？”

梵天言：“佛所化生，吾如彼生。”

网明言：“佛化所¹⁶⁵生，则无¹⁶⁶生处。”

梵天言：“宁可见不？”

网明言：“以佛力故见。”

梵天言：“我生亦如是，以业力故。”

网明言：“汝于起业中行耶？”

梵天言：“我不于起业中行。”

网明言：“云何言以业力故？”

梵天言：“如业性，力亦如是；是二不出于如。”

尔时，舍利弗白佛言：“世尊！若有能入是菩萨随宜所说法中者，得大功德。所以者何？世尊！乃至闻是上人名字尚得大利，何况闻其所说？譬如有树不依于地，在虚空中而现根茎、枝叶、华果，甚为希有；此人行相亦复如是，不住一切法，而于十方现有行、有生死，亦有如是智慧辩才。世尊！若有善男子、善女人闻是智慧自在力者，其谁不发阿耨多罗三藐三菩提心？”

尔时，有一菩萨名曰普华，在会中坐，谓长

¹⁶⁵ 丽本：所化；永乐北藏本及龙藏本：化所

¹⁶⁶ 丽本：无有；永乐北藏本及龙藏本：则无

老舍利弗：“仁者已得法性，佛亦称汝于智慧人中为最第一，何以不能现如是智慧辩才自在力耶？”

舍利弗言：“普华！佛诸弟子随其智力能有所说。”

普华言：“舍利弗！法性有多少耶？”

舍利弗言：“无也。”

普华言：“汝何以言佛诸弟子随其智力能有所说？”

舍利弗言：“随所得法而有所说。”

普华言：“汝证法性无量相耶？”

舍利弗言：“然！”

普华言：“汝云何言随所得法而有所说？如法性无量相，得亦如是；如得，说亦如是。何以故？法性无量故。”

舍利弗言：“法性非得相。”

普华言：“若法性非得相者，汝出法性得解脱耶？”

舍利弗言：“不也！”

普华言：“何故尔耶？”

舍利弗言：“若出法性得解脱者，则坏法性。”

普华言：“是故，舍利弗！如仁¹⁶⁷得道，法性亦尔。”

舍利弗言：“我为听来，非为说也。”

普华言：“一切法皆入法性，此中宁有说有¹⁶⁸听者不？”

舍利弗言：“不也。”

普华言：“若然者，汝何故言‘我为听来，非为说也¹⁶⁹’？”

舍利弗言：“佛说二人得福无量：一者，专精说法；二者，一心听受。是故汝今应说，我当听受。”

普华言：“汝入灭尽定，能听法耶？”

舍利弗言：“入灭尽定，无有二行而听法也。”

普华言：“汝信佛说一切法是灭尽相不？”

舍利弗言：“然！一切法皆灭尽相，我信是说。”

普华言：“若然者，舍利弗常不能听法。所以者何？一切法常灭尽相故。”

舍利弗言：“汝能不起于¹⁷⁰定而说法耶？”

普华言：“颇有一法非是定耶？”

¹⁶⁷ 丽本：仁者；永乐北藏本及龙藏本：仁

¹⁶⁸ 丽本：者；永乐北藏本及龙藏本：有

¹⁶⁹ 丽本：耶；永乐北藏本及龙藏本：也

¹⁷⁰ 丽本：于；永乐北藏本及龙藏本：於

舍利弗言：“无也。”

普华言：“是故当¹⁷¹知一切凡夫常在于定。”

舍利弗言：“以何定故，一切凡夫常在定耶？”

普华言：“以不坏法性三昧故。”

舍利弗言：“若然者，凡夫、圣人无有差别。”

普华言：“如是，如是！我不欲令凡夫、圣人有差别也。所以者何？圣人无所断，凡夫无所生，是二不出法性平等之相。”

舍利弗言：“何等是诸法平等相？”

普华言：“如舍利弗所得知见。舍利弗！汝生贤圣法耶？”

答言：“不也！”

“汝灭凡夫法耶？”

答言：“不也！”

“汝得贤圣法耶？”

答言：“不也。”

“汝见凡夫法耶？”

答言：“不也。”

“舍利弗！汝何知见，说言得道？”

答言：“汝不闻凡夫如即是漏尽解脱如、漏尽解脱如即是无余涅槃如？”

¹⁷¹ 丽本：常；永乐北藏本及龙藏本：当

“舍利弗！是如名不异如、不坏如，应以是如知一切法。”

尔时，舍利弗白佛言：“世尊！譬如大火，一切诸炎皆是烧相；如是，诸善男子所说法皆入法性。”

佛告舍利弗：“如汝所言，是诸善男子所说法皆入法性。”

尔时，网明¹⁷²谓舍利弗：“佛说仁者于智慧人中为最第一，以何智慧得第一乎¹⁷³？”

舍利弗言：“所谓声闻因声得解，以是智慧说我于中为第一耳，非谓菩萨。”

网明言：“智慧是戏论相耶？”

答言：“不也。”

网明言：“智慧非平等相耶？”

答言：“是¹⁷⁴。”

网明言：“今仁者得平等智慧，云何说智慧有量？”

答言：“善男子，以法性相故，智慧无量；随入法性多少故，智慧有量。”

网明言：“无量法终不作有量。仁者何故说

¹⁷² 丽本：网明菩萨；永乐北藏本及龙藏本：网明

¹⁷³ 丽本：耶；永乐北藏本及龙藏本：乎

¹⁷⁴ 丽本：如是；永乐北藏本及龙藏本：是

智慧有量？”

即时，舍利弗默然不答。

菩萨光明品第九¹⁷⁵

尔时，长老大迦叶承佛圣旨，白佛言：“世尊！是网明菩萨以何因缘号网明乎？”

佛告网明：“善男子，现汝福报光明因缘，令诸天、人、一切世间皆得欢喜，其有福德因缘者当发菩提心。”

于是，网明即受佛教，偏袒右肩，从右手赤白庄严爪¹⁷⁶指间放大光明，普照十方无量无边阿僧祇佛国，皆悉通达。其中地狱、畜生、饿鬼、盲聋瘖症、手足拘躄¹⁷⁷、老病苦痛、贪欲瞋恚愚痴、裸形丑陋、贫穷饥渴、圜圜系闭、困厄垂死、悭贪破戒瞋恚、懈怠妄念无慧、少于闻见、无惭无愧、堕邪疑网，如是等众生，遇斯光者皆得快乐，无有众生为贪欲、瞋恚、愚痴、憍慢、忧愁、怀恨等之所恼也。其在佛前大会之众：菩萨摩訶萨、天、龙、夜叉、乾闥婆等，及比丘、比丘尼、优婆塞、优婆夷众，是诸众生同一金色与佛无异，

¹⁷⁵ 丽本：不分品，注曰：丹尔时有菩萨光明品第九；永乐北藏本及龙藏本：菩萨光明品第九

¹⁷⁶ 丽本：抓；永乐北藏本及龙藏本：爪

¹⁷⁷ 丽本：瘖；永乐北藏本及龙藏本：躄

有三十二相、八十随形好、无见顶者，皆坐宝莲华座，宝交络盖罗覆其上，等无差别。诸会众生皆得快乐，譬如菩萨入发喜庄严三昧。时诸大众得未曾有，各各相见如佛无异，不见佛身为大己身为小。

又以光明力故，寻时下方有四菩萨从地涌¹⁷⁸出，合掌而立，欲共礼佛，作是念言：“何者真佛？我欲礼敬。”

即闻空中声曰：“是网明菩萨光明之力，一切大众同一金色，与佛不¹⁷⁹异。”

时，四菩萨发希有心，作如是言：“今此会中¹⁸⁰其色无异，一切诸法亦复如是。若我此言诚实无虚，世尊释迦牟尼当现异相，令我今得供养礼事。”

即时，佛以莲华宝师子座上升虚空高一多罗树。于是四菩萨头面礼佛足，作如是言：“如来智慧不可思议，网明菩萨福德本愿亦不可思议，能放如是无量光明。”

尔时，佛告网明菩萨言：“善男子，汝今已作佛事，令无量众生住于佛道，可摄光明。”于

¹⁷⁸ 丽本：踊；永乐北藏本及龙藏本：涌

¹⁷⁹ 丽本：无；永乐北藏本及龙藏本：不

¹⁸⁰ 丽本：众会；永乐北藏本及龙藏本：会中

是网明菩萨¹⁸¹即受佛教，还摄光明。摄光明已，此诸大众威仪色相还复如故，见佛坐本师子上。

尔时，长老大迦叶白佛言：“世尊！此四菩萨从何所来？”

四菩萨言：“我等从下方世界来。”

大迦叶¹⁸²言：“其国何名？佛号何等？”

四菩萨言：“国名现诸宝庄严，佛号一宝盖，今现在¹⁸³说法。”

大迦叶言：“其佛国土去此几何？”

四菩萨言：“佛自知之。”

大迦叶言：“汝等何故来此？”

四菩萨言：“是网明菩萨光明照彼，我等遇之，即闻释迦牟尼佛名及网明菩萨，是故我等今来见佛并网明上人。”

迦叶¹⁸⁴白佛言：“世尊！一宝盖佛现诸宝庄严世界，去此几何？”

佛言：“去此七十二恒河沙佛土。”

大迦叶言：“世尊！是四菩萨从彼发来，几时至此？”

佛言：“如一念顷，于彼不现忽然而至。”

¹⁸¹ 丽本：网明；永乐北藏本及龙藏本：网明菩萨

¹⁸² 丽本：迦叶；永乐北藏本及龙藏本：大迦叶

¹⁸³ 丽本：现；永乐北藏本及龙藏本：现在

¹⁸⁴ 丽本：大迦叶；永乐北藏本及龙藏本：迦叶

大迦叶言：“世尊！此诸菩萨光明远照，神通速疾甚为希有！¹⁸⁵今网明菩萨光明远照，是四菩萨发来速疾。”

佛言迦叶：“如汝所说，菩萨摩訶萨所行不可思议，一切声闻、辟支佛所不能及。”

尔时，长老大迦叶谓网明菩萨言：“善男子，汝现光明照此大会，皆作金色，以何因缘？”

网明言：“长老大迦叶！可问世尊，当为汝说！”

即时，大迦叶以此白佛。

佛言：“迦叶，是网明菩萨成佛时，其会大众同一金色，咸共信乐一切智慧。其佛国土乃至无声闻、辟支佛名，唯有清净诸菩萨摩訶萨会。”

大迦叶白佛言：“世尊！生彼菩萨当知如佛等无有异¹⁸⁶。”

佛言：“如汝所说，生彼菩萨当知如佛。”

于是，会中四万四千人皆发阿耨多罗三藐三菩提心已，愿生彼国，白佛言：“世尊！若网¹⁸⁷明菩萨得成佛时，我等当¹⁸⁸生其国！”

¹⁸⁵ 丽本：今是；永乐北藏本及龙藏本：今

¹⁸⁶ 丽本：佛；永乐北藏本及龙藏本：佛等无有异

¹⁸⁷ 丽本：网；永乐北藏本及龙藏本：世尊！若网

¹⁸⁸ 丽本：愿；永乐北藏本及龙藏本：当

¹⁸⁹尔时，长老大迦叶白佛言：“世尊！网明菩萨几时当得阿耨多罗三藐三菩提？”

佛言：“迦叶！汝自问网明。”

于是，迦叶问网明菩萨言：“善男子，仁者几时当得阿耨多罗三藐三菩提？”

网明言：“大迦叶！若有问幻所化人：‘汝几时当得阿耨多罗三藐三菩提？’是幻人当云何答？”

大迦叶言：“善男子，幻所化人无决定相，当何所答？”

网明言：“大迦叶！一切诸法亦如幻所化人，无决定相，谁可问言：‘汝几时当成阿耨多罗三藐三菩提？’”

大迦叶言：“善男子，幻所化人离于自相，无异、无别、无所志愿。汝亦如是耶？若如是者，汝云何能利益无量众生？”

网明言：“阿耨多罗三藐三菩提即是一切众生性，一切众生性即是幻性，幻性即是一切法性。于是法中，我不见有利、不见无利。”

大迦叶言：“善男子，汝今不令众生住菩提耶？”

¹⁸⁹ 丽本此处分品，问谈品第六（丹无此品名），永乐北藏本及龙藏本不分品

网明言：“诸佛菩提有住相耶？”

大迦叶言：“无也！”

网明言：“是故我¹⁹⁰不令众生住于菩提，亦不令住声闻、辟支佛道。”

大迦叶言：“善男子，汝今欲趣何所？”

网明言：“我所趣，如如趣。”

大迦叶言：“如无所趣，亦无有转。”

网明言：“如如，无趣无转，一切法住如相故，我¹⁹¹无趣无转。”

大迦叶言：“若无趣无转，汝云何教化众生？”

网明言：“若人发愿，则是不能教化众生；若人于法有转，是亦不能教化众生。”

大迦叶言：“善男子，汝不转众生生死耶？”

网明言：“我尚不得生死，何况于生死中而转众生？”

大迦叶言：“汝不令众生得涅槃耶？”

网明言：“我尚不见涅槃，何况教化众生令住涅槃？”

大迦叶言：“善男子，若汝不得生死、不见涅槃，何故今为无量众生行于菩提，此岂不为灭

¹⁹⁰ 丽本：我今；永乐北藏本及龙藏本：我

¹⁹¹ 丽本：我亦；永乐北藏本及龙藏本：我

度众生耶？”

网明言：“若菩萨得生死分别涅槃，因众生行¹⁹²菩提，此则不应说为菩萨。”

大迦叶言：“善男子，汝今于何处行？”

网明言：“我非生死中行，非涅槃中行，亦不以众生相行。大迦叶！如汝所问‘汝何处行’者，如佛所化人行处，吾于彼行。”

大迦叶言：“佛所化人无有行处。”

网明言：“当知一切众生所行亦如是相。”

大迦叶言：“佛所化人无贪、无恚、无痴，若一切众生所行如是相者，众生贪、恚、痴从何所起？”

网明言：“我今问汝，随意答我。大迦叶！汝今宁有贪恚痴不？”

答言：“无¹⁹³也。”

网明言：“是贪、恚、痴尽灭耶？”

答言：“不也。”

网明言：“若大迦叶今无贪、恚、痴，亦不尽灭者，汝置贪、瞋¹⁹⁴、痴于何所耶？”

答言：“善男子，凡夫从颠倒起妄想分别，

¹⁹² 丽本：行于；永乐北藏本及龙藏本：行

¹⁹³ 丽本：不；永乐北藏本及龙藏本：无

¹⁹⁴ 丽本：恚；永乐北藏本及龙藏本：瞋

生贪、恚、痴耳。贤圣法中善知颠倒实性故，无妄想分别，是以无贪、恚、痴。”

“大迦叶！于汝意云何？若法从颠倒起，是法为实？为虚妄耶？”

答言：“是法虚妄，非是实也。”

网明言：“若法非实，可令实耶？”

答言：“不也！”

网明言：“若法非实，仁者欲于是中得贪、恚、痴耶？”

答言：“不也。”

网明言：“若然，何者¹⁹⁵是贪恚痴能恼众生者？”

答言：“善男子，若尔者¹⁹⁶，一切¹⁹⁷从本已来离贪、恚、痴相。”

网明言：“以是故，我说一切法相如佛所化。”说是法时，四万四千菩萨得柔顺法忍。

¹⁹⁵ 丽本：所；永乐北藏本及龙藏本：者

¹⁹⁶ 丽本：尔；永乐北藏本及龙藏本：尔者

¹⁹⁷ 丽本：一切法；永乐北藏本及龙藏本：一切

菩萨受记品第十¹⁹⁸

尔时，长老大迦叶白佛言：“世尊！若网明菩萨所见，众生不应复畏堕三恶道；若闻网明所说法者，魔不得便；若为网明所教化者，不畏堕声闻、辟支佛道。世尊！愿说网明功德庄严国土。”

佛言：“迦叶，是网明菩萨在在国土游行之处，利益无量众生。迦叶，汝见网明所放光明不？”

答言：“已见。”

佛言：“若三千大千世界满中芥子尚可算数，今网明光明令诸众生住菩提者不可数也。迦叶，是网明菩萨所放光明饶益尚尔，何况说法？汝今谛听！我当粗略说其功德。

“迦叶，是网明菩萨过七百六十万阿僧祇劫当得作佛，号普光自在王如来、应供、正遍知，世界曰¹⁹⁹集妙功德。其佛趣菩提树时，国中诸魔、魔民悉皆正定于阿耨多罗三藐三菩提。其佛国土，以真栴檀宝为地，地平如掌，柔软²⁰⁰细滑，如加²⁰¹陵伽衣，处处皆以众宝庄严，无三恶道亦无八

¹⁹⁸ 丽本：不分品，注曰：丹有菩萨授记品第二十五幅梵天上有萨婆若品第十一；永乐北藏本及龙藏本：菩萨受记品第十

¹⁹⁹ 丽本：名曰；永乐北藏本及龙藏本：曰

²⁰⁰ 丽本：濡；永乐北藏本及龙藏本：软

²⁰¹ 丽本：迦；永乐北藏本及龙藏本：加

难。其国广长，皆以妙宝莲华色香且²⁰²好以为校²⁰³饰。普光自在王如来有无量菩萨僧，善修无量法门，得无量自在神通，皆以光明庄严其身；得诸陀罗尼藏无量²⁰⁴辩才，善能说法；光明神力皆悉通达，能破魔怨；惭愧念慧，诸妙功德以修其心。彼佛国土无有女人，其诸菩萨皆于宝莲华中结跏²⁰⁵趺坐，自然化生，以禅乐为食。诸所须物，经行之处、房舍、床榻、园林、浴池，应念即至。

“迦叶，是普光自在王如来不以文字说法，但放光明照诸菩萨，即得²⁰⁶无生法忍；其佛光明复照十方通达无碍，令诸众生得离烦恼。又其光明常出三十二种清净法音。何等三十二？所谓诸法空，无众生见故；诸法无相，离分别故；诸法无作，出三界故；诸法离欲，性寂灭故；诸法离瞋，无有碍故；诸法离痴，无暗冥故；诸法无所从来，本无生故；诸法无所去，无所至故；诸法不住，无所依故；诸法过三世，去、来、现在无所有故；诸法无异，其性一故；诸法不生，离于报故；诸法无业，业报作者不可得故；诸法不作，

²⁰² 丽本：妙；永乐北藏本及龙藏本：且

²⁰³ 丽本：校；永乐北藏本及龙藏本：校

²⁰⁴ 丽本：碍；永乐北藏本及龙藏本：量

²⁰⁵ 丽本：加；永乐北藏本及龙藏本：跏

²⁰⁶ 丽本：光触其身，即得；永乐北藏本及龙藏本：即得

无所起故；诸法无起，无为性故；诸法无为，离生灭故；诸法真，不从和合生故；诸法实，一道门故；诸法无众生，众生不可得故；诸法无我，第一义故；诸法钝，无所知故；诸法舍，离憎爱故；诸法离烦恼，无有热故；诸法无垢，性不污故；诸法一相，离欲际故；诸法离相，常定故；诸法住实际，性不坏故；诸法如相，不分别故；诸法入法性，遍入故；诸法无缘，诸缘²⁰⁷不合故；诸法是菩提，如实见故；诸法是涅槃，无因缘故。迦叶，普光自在王如来光明常出如是清净法音，亦能²⁰⁸令诸菩萨施作佛事。其佛国土无有魔事，佛寿无量阿僧祇劫。”

大迦叶白佛言：“若人欲得清净佛土者，应取如网明菩萨所修功德，具足清净国土。”

“如是，迦叶，网明²⁰⁹菩萨于诸无量阿僧祇佛所，随所愿修²¹⁰，功德具足故。”

尔时，思益梵天谓网明菩萨：“仁者已得从佛受记！”

网明言：“一切众生皆从佛受记。”

梵天言：“于何事中而得受记？”

²⁰⁷ 丽本：缘；永乐北藏本及龙藏本：诸缘

²⁰⁸ 丽本：能；永乐北藏本及龙藏本：亦能

²⁰⁹ 丽本：是网明；永乐北藏本及龙藏本：网明

²¹⁰ 丽本：随愿修行；永乐北藏本及龙藏本：随所愿修

网明言：“随业受报而得受记。”

梵天言：“汝作何业而得受记？”

网明言：“若业非身作、非口作、非意作，是业可得示不？”

梵天言：“不可示也。”

网明言：“菩提是起作相耶？”

梵天言：“不也。何以故？菩提是无为，非起作相²¹¹。”

网明言：“可以起作相得无为菩提不？”

梵天言：“不也。”

“梵天，是故当知，若无业、无业报，无诸行、无起诸行，是名菩提；如菩提性，得亦如是；如得性，受记亦如是，不可以起作法而得受记。”

梵天言：“善男子，汝不行六波罗蜜，然后得受记耶？”

网明言：“如汝所说，菩萨行六波罗蜜而得受记。梵天，若菩萨舍一切烦恼，名为檀波罗蜜。于诸法无所起，名为尸罗波罗蜜。于诸法无所伤，名为羼提波罗蜜。于诸法离相，名为毗梨耶波罗蜜。于诸法无所住，名为禅波罗蜜。于诸法无戏论，名为般若波罗蜜。梵天，菩萨如是行六波罗

²¹¹ 丽本：相故；永乐北藏本及龙藏本：相

蜜，于何处行？”

梵天言：“无处行也。所以者何？凡有所²¹²行皆是不行；若行即是不行，若不行即是行。”

“梵天，以是故，当知无所行是菩提。如汝所问‘汝得受菩提记’者，如如法性得受记，我所受记亦如是。”

梵天言：“善男子，如如法性无受记。”

网明言：“诸菩萨受记相皆亦如是，如如²¹³法性。”

尔时，思益梵天白佛言：“世尊！菩萨以何行，诸佛授阿耨多罗三藐三菩提记？”

佛言：“若菩萨不行生法、不行灭法，不行善、不行不善，不行世间、不行出世间，不行有罪法、不行无罪法，不行有漏法、不行无漏法，不行有为法、不行无为法，不行修道、不行除断，不行生死、不行涅槃，不行见法、不行闻法、不行觉法、不行知法，不行施、不行舍、不行戒、不行覆、不行忍、不行善、不行发、不行精进、不行禅、不行三昧、不行慧、不行行、不行知、不行得。梵天，若菩萨如是行者，诸佛则授阿耨

²¹² 丽本：所有；永乐北藏本及龙藏本：有所

²¹³ 丽本：如如如；永乐北藏本及龙藏本：如如

多罗三藐三菩提记。所以者何？诸所有行²¹⁴皆有所是，无所是是菩提；诸所有行皆是分别，无分别是菩提。诸所有行皆是起作，无起作是菩提。诸所有行皆是戏论，无戏论是菩提。是故当知，若菩萨过诸所行则得受记。”

“唯然世尊！受记者有何义？”

佛言：“离诸法二相故²¹⁵是受记义，不分别生灭是²¹⁶受记义，离身、口、意业相是受记义。梵天，我念过去有劫名善²¹⁷见，我于此劫供养七十二那由他佛，是诸如来不见授记。又过是劫，劫名善化，我于此劫供养二十二亿诸佛²¹⁸，是诸如来亦不见授记。又过是劫，劫名梵叹，我于此劫供养万八千佛，是诸如来亦不见授记。又过是劫，劫名无咎，我于此劫供养三万二千佛，是诸如来亦不见授记。又过是劫，劫名庄严，我于此劫供养四百四十万佛，我皆以一切供养之具而供养之，是诸如来亦不见授记。梵天，我于往昔供养诸佛，恭敬、尊重、赞叹，净修梵行，一切布施、一切持戒及行头陀，离于瞋恚，忍辱慈心，

²¹⁴ 丽本：诸所有行皆是取相，无相、无分别则是菩提；永乐北藏本及龙藏本：诸所有行

²¹⁵ 丽本：相；永乐北藏本及龙藏本：相故

²¹⁶ 丽本：道是；永乐北藏本及龙藏本：是

²¹⁷ 丽本：慧；永乐北藏本及龙藏本：善

²¹⁸ 丽本：佛；永乐北藏本及龙藏本：诸佛

如所说行勤修精进，一切所闻皆能受持，独处远离入诸禅定，随所闻慧读²¹⁹诵思问，是诸如来亦不见授记。何以故？依止所行故。以是当知，若诸菩萨出过一切诸行则得受记。我若以一劫、若减一劫，说是诸佛名号不可得尽。

“梵天，我于是后见燃灯佛，即得无生法忍。佛时授我记言：‘汝于来世当得作佛，号释迦牟尼如来、应供、正遍知。’我尔时出过一切诸行，具足六波罗蜜。所以者何？若菩萨能舍诸相，名为檀波罗蜜；能灭诸受²²⁰持，名为尸罗波罗蜜；不为六尘所伤，名为羼提波罗蜜；离诸所行，名为毗梨耶波罗蜜；不忆念一切法，名为禅波罗蜜；能忍诸法无生性，名为般若波罗蜜。我于燃灯佛所，具足如是六波罗蜜。

萨婆若品第十一²²¹

“梵天，我从初发菩提心已来所作布施，于此五华布施，百分不及一，百千分、百千万亿分，乃至算数譬喻所不能及。我从初发心已来，受戒、持戒、行头陀，于此常灭戒，百分不及一，乃至

²¹⁹ 丽本：赞；永乐北藏本及龙藏本：

²²⁰ 丽本：所受；永乐北藏本及龙藏本：受

²²¹ 丽本：不分品，注曰：丹有菩萨授记品第二十五幅梵天上有萨婆若品第十一；永乐北藏本及龙藏本：菩萨受记品第十

算数譬喻所不能及。我从初发心已来柔和忍辱，于毕竟忍法，百分不及一，乃至算数譬喻所不能及。我从初发心已来发勤精进，于²²²不取不舍精进，百分不及一，乃至算数譬喻所不能及。我从初发心已来禅定独处，于此无住禅定，百分不及一，乃至算数譬喻所不能及。我从初发心已来思惟筹量智慧，于此无戏论智慧，百分不及一，百千分百千万亿分，乃至算数譬喻所不能及。梵天，是故当知，我尔时得具足六波罗蜜。”

“世尊！云何名具足六波罗蜜？”

“梵天，若不念施、不依止戒、不分别忍、不取精进、不住禅定、不二于慧，是名具足六波罗蜜。”

又问：“具足六波罗蜜已，能满足何法？”

佛言：“具足六波罗蜜已，能满足萨婆若。”

“世尊！云何具足六波罗蜜已，能满足萨婆若？”

“梵天，布施平等即是萨婆若平等；持戒平等即是萨婆若平等；忍辱平等即是萨婆若平等；精进平等即是萨婆若平等；禅定平等即是萨婆若平等；智慧平等即是萨婆若平等；以是平等一

²²² 丽本：于此；永乐北藏本及龙藏本：于

切法，名为萨婆若。又，梵天，满²²³足布施相、持戒相、忍辱相、精进相、禅定相、智慧相，是名萨婆若。梵天，如是满²²⁴足六波罗蜜能满足萨婆若。”

“世尊！云何当知满足萨婆若？”

“梵天，若不受眼、不受色、不受耳、不受声、不受鼻、不受香、不受舌、不受味、不受身、不受触、不受意、不受法，若不受是内外入²²⁵，名为满足萨婆若。我得如是满足萨婆若，于眼无所著，于色、耳、声、鼻、香、舌、味、身、触、意、法无所著，是故如来名为无碍知见萨婆若。梵天，萨婆若于法无所受。何以故？以无用故。无用即是无所有义。无所有²²⁶即是空，如虚空义、同虚空相是萨婆若，是故于法无所受。梵天，譬如一切所作皆因虚空，而虚空无所依；如是诸智慧皆从萨婆若出，而萨婆若无所依。”

梵天白佛言：“世尊²²⁷所说萨婆若萨婆若者，为何谓也？”

“梵天，一切所行是智为真智²²⁸，非诸声闻、

²²³ 丽本：具；永乐北藏本及龙藏本：满

²²⁴ 丽本：具；永乐北藏本及龙藏本：满

²²⁵ 丽本：十二入；永乐北藏本及龙藏本：入

²²⁶ 丽本：有义；永乐北藏本及龙藏本：有

²²⁷ 丽本：世尊！世尊；永乐北藏本及龙藏本：世尊

²²⁸ 丽本：真；永乐北藏本及龙藏本：真智

辟支佛所及故，名萨婆若。诸有所行皆能成就故，名萨婆若。能破一切所念戏论故，名萨婆若。诸所教勅、诸所防制，如此众生所行之法，皆从中出故，名为²²⁹萨婆若。得诸圣智，若学智、若无学智、若辟支佛智，皆从中出故，名为²³⁰萨婆若。正行故，名为²³¹萨婆若。能分别一切药故，名萨婆若。能灭一切众生病故，名萨婆若。能除一切烦恼习气故，名萨婆若。常在定故，名萨婆若。一切法中无疑故，名萨婆若。一切世间、出世间智慧皆从中出故，名萨婆若。善知一切智慧方便相故，名萨婆若。”

尔时，思益梵天白佛言：“未曾有也！世尊！诸佛如来智慧甚深，心无所缘而知一切众生心、心所行。世尊！萨婆若得²³²如是无量功德，其谁善男子、善女人不发阿耨多罗三藐三菩提心？”

于是，网明菩萨白佛言：“世尊！若有菩萨希²³³望功德利益²³⁴而发菩提心者，不名发大乘也。所以者何？一切法无功德利，以无对处故。世尊！菩萨摩訶萨不应为功德利故发菩提心，但为大悲

²²⁹ 丽本：名；永乐北藏本及龙藏本：名为

²³⁰ 丽本：名；永乐北藏本及龙藏本：名为

²³¹ 丽本：名；永乐北藏本及龙藏本：名为

²³² 丽本：有；永乐北藏本及龙藏本：得

²³³ 丽本：悌；永乐北藏本及龙藏本：希

²³⁴ 丽本：利；永乐北藏本及龙藏本：利益

心故、灭众生诸苦恼故、不自忧苦故、生诸善法故、解脱诸邪见故、灭除诸病故、舍我所贪著故、不观憎爱故、不没世法故、厌患有为故、安住涅槃故发菩提心。世尊！菩萨不应于众生求其恩报，亦不应观作与不作，又于苦乐心不倾动。世尊！何谓菩萨家清净？”

佛言：“善男子，菩萨若生转轮圣王家，不名家清净；若生帝释中、若生梵王中，亦不名家清净；在所生处，乃至畜生，自不退失善根，亦令众生生诸善根，是名菩萨家清净。又，网明，慈是菩萨家，心平等故；悲是菩萨家，深心念故；喜是菩萨家，生法喜故；舍是菩萨家，离贪著故；不舍菩提是菩萨家，不贪声闻、辟支佛地故。”

思益梵天所问经卷第二

思益梵天所问经卷第三

姚秦三藏法师鸠摩罗什译²³⁵

菩萨无二品第十二²³⁶

尔时，思益梵天白佛言：“世尊！是文殊师利法王子在此大会而无所说。”

佛即告文殊师利：“汝于此²³⁷所说法中可少说之。”

文殊师利白佛言：“世尊！佛所得法宁可识不？”

佛言：“不可识也。”

“世尊！是法可说、可演、可论不？”

佛言：“不可说、不可演、不可论。”

“世尊！若是法不可说、不可演、不可论者，则不可示也²³⁸。”

尔时，思益梵天谓文殊师利：“汝不为众生演说法乎？”

文殊师利言：“梵天，法性中有二相耶？”

²³⁵ 丽本：姚秦龟兹国三藏鸠摩罗什译

²³⁶ 丽本：谈论品第七（丹菩萨无二品第十二）；永乐北藏本及龙藏本：菩萨无二品第十二

²³⁷ 丽本：此会；永乐北藏本及龙藏本：此

²³⁸ 丽本：示；永乐北藏本及龙藏本：示也

梵天言：“无也。”

文殊师利言：“一切法不入法性耶？”

梵天言：“然！”

文殊师利言：“若法性是不二相，一切法入法性中，云何当为众生说法？”

梵天言：“颇有说法亦无二相²³⁹耶？”

文殊师利言：“若决定得说者、听者，可有说法亦无有二。”

“文殊师利！如来不说法耶？”

文殊师利言：“佛虽说法不以二相。何以故？如来性无二故，虽有所说而无二也。”

梵天言：“若一切法无二，其谁为二？”

文殊师利言：“凡夫²⁴⁰贪着我故，分别二耳；不二者，终²⁴¹不为二。虽种种分别为二，然其实际无有二相。”

梵天言：“云何识无二法？”

文殊师利言：“若无二可识，则非无二。所以者何？无二相者，不可识也。梵天，二即是识业，不可识法，佛所说也。是法不尔如所说，何以故？是法无文字故。”

²³⁹ 丽本：二；永乐北藏本及龙藏本：二相

²⁴⁰ 丽本：起；永乐北藏本及龙藏本：夫

²⁴¹ 丽本：法性终；永乐北藏本及龙藏本：终

“文殊师利！佛所说法终何所至？”

文殊师利言：“如来²⁴²说法至无所至。”

梵天言：“佛所说法不至涅槃耶？”

文殊师利言：“涅槃²⁴³可得至耶？”

梵天言：“涅槃无来处、无至处。”

文殊师利言：“如是！佛所说法至无所至。”

梵天言：“是法谁听？”

答言：“如所说。”

梵天言：“云何如所说？”

答言：“如不识不闻。”

梵天言：“谁能听如来如是法？”

答言：“不漏六尘者。”

梵天言：“谁能知是法？”

答言：“无识、无分别、无诤讼者。”

梵天言：“云何比丘名多诤讼？”

答言：“是好、是恶，此名诤讼；是理、是非理，此名诤讼；是垢、是净，此名诤讼；是善、是不善，此名诤讼；是戒²⁴⁴、是毁戒，此名诤讼；是应作、是不应作，此名诤讼；以是法得道、以是法得果，此名诤讼。梵天，若于法中有高下心，

²⁴² 丽本：佛所；永乐北藏本及龙藏本：如来

²⁴³ 丽本：涅槃中；永乐北藏本及龙藏本：涅槃

²⁴⁴ 丽本：持戒；永乐北藏本及龙藏本：戒

贪着所²⁴⁵受，皆是诤讼，佛所说法无有诤讼。梵天，乐戏论者，无不诤讼；乐诤讼者，无沙门法；乐沙门法者，无有妄想贪着。”

梵天言：“云何比丘随佛语、随佛教？”

答言：“若比丘称赞、毁辱其心不动，是名随佛教；若比丘不随文字语言，是名随佛语。又比丘灭一切诸相，是名随佛教；不违于义，是名随佛语。若比丘守护于法，是名随佛教；若不²⁴⁶违佛语，是名随佛语。”

梵天言：“云何比丘能守护法？”

答言：“若比丘不逆平等、不坏法性，是名能守护法。”

梵天言：“云何比丘亲近于佛？”

答言：“若比丘于诸法中，不见有法若近若远，是名亲近于佛。”

梵天言：“云何比丘给侍于佛？”

答言：“若比丘身、口、意无所作，是名给侍于佛。”

梵天言：“谁能供养佛？”

答言：“不²⁴⁷起福业，不起不²⁴⁸动业者。”

²⁴⁵ 丽本：取；永乐北藏本及龙藏本：所

²⁴⁶ 丽本：不；永乐北藏本及龙藏本：若不

²⁴⁷ 丽本：若不；永乐北藏本及龙藏本：不

²⁴⁸ 丽本：无；永乐北藏本及龙藏本：不

梵天言：“谁能见佛？”

答言：“若不着肉眼、不着天眼、不着慧眼，是名能见佛。”

梵天言：“谁能见法？”

答言：“不逆诸因缘法者。”

梵天言：“谁能顺见诸因缘法？”

答言：“不起平等，不见平等所生相者。”

梵天言：“谁得真智？”

答言：“不生不灭诸漏者。”

梵天言：“谁能随学如来？”

答言：“不起、不受、不取、不舍诸法者。”

梵天言：“谁名正行？”

答言：“不堕三界者。”

梵天言：“谁为善人？”

答言：“不受后身者。”

梵天言：“谁为乐人？”

答言：“无我、无我所者。”

梵天言：“谁为得解脱者²⁴⁹？”

答言：“不坏缚者。”

梵天言：“谁为得度？”

答言：“不住生死、不住涅槃者。”

²⁴⁹ 丽本：脱；永乐北藏本及龙藏本：解脱者

梵天言：“漏尽比丘尽何事耶？”

答言：“若有所尽，不名漏尽。知诸漏空相，随如是知，名为漏尽。”

梵天言：“谁为实语？”

答言：“离诸言论道者。”

梵天言：“谁为入道？”

答言：“凡夫有入道²⁵⁰行者，知一切有为法无所从来、无所从去，则无²⁵¹入道。”

梵天言：“谁能见圣谛？”

答言：“无有见圣谛者。所以者何？随所有见皆为虚妄，无所见者乃名见谛。”

梵天言：“不见何法名为见谛？”

答言：“不见一切诸见名为见谛。”

梵天言：“是谛当于何求？”

答言：“当于四颠倒中求。”

梵天言：“何故作如是说？”

答言：“求四颠倒，不得净、不得常、不得乐、不得我；若不得净是即不净；若不得常是即无常；若不得乐是即为苦；若不得我是即无我。梵天，一切法空、无我，是为圣谛。若能如是求

²⁵⁰ 丽本：圣道；永乐北藏本及龙藏本：道圣

²⁵¹ 丽本：为；永乐北藏本及龙藏本：无

谛，是人不见苦、不断集、不证灭、不修道。”

梵天言：“云何名修道？”

答言：“若不分别是法、是非法，离于二相，名为修道；以是道求一切法不得，是名为道。是道不令人离生死至涅槃。所以者何？不离不至乃名圣道。”

尔时，有摩诃罗梵天子，名曰等行，问文殊师利：“何谓优婆塞归依佛、归依法、归依僧？”

答言：“若优²⁵²婆塞不起二见：不起我见、不起彼见——不起我见、不起佛见，不起我见、不起法见，不起我见、不起僧见，是名归依佛、归依法、归依僧。又优婆塞不以色见佛，不以受、想、行、识见佛，是名归依佛。若优²⁵³婆塞于法无所分别，亦不行非法，是名归依法。若优婆塞不离有为法见无为法，不离无为法见有为法，是名归依僧。又优婆塞不得佛、不得法、不得僧，是名归依佛、归依法、归依僧。”

尔时，等行菩萨问文殊师利言：“是诸菩萨发菩提心者，为何所趣²⁵⁴？”

答言²⁵⁵：“趣于虚空。所以者何？阿耨多罗

²⁵² 丽本：优；永乐北藏本及龙藏本：若优

²⁵³ 丽本：优；永乐北藏本及龙藏本：若优

²⁵⁴ 丽本：趣何所；永乐北藏本及龙藏本：何所趣

²⁵⁵ 丽本：曰；永乐北藏本及龙藏本：言

三藐三菩提同虚空故。”

等行言：“云何菩萨名发阿耨多罗三藐三菩提心？”

答言：“若菩萨知一切发非发，一切法非法，一切众生非众生，是名菩萨发阿耨多罗三藐三菩提心。”

名字义品第十三²⁵⁶

尔时，等行菩萨白佛言：“世尊！所言菩萨菩萨者，为何谓耶？”

佛言：“善男子，若菩萨于邪定众生发大悲心，于正定众生不见殊异，故言菩萨。所以者何？菩萨不为正定众生、不为不定众生故发心，但为度邪定众生故而起大悲，发阿耨多罗三藐三菩提心，故名²⁵⁷菩萨。”

²⁵⁸尔时，菩提菩萨白佛言：“世尊！我²⁵⁹亦乐说所以为菩萨。”

佛言：“若乐说者便说²⁶⁰！”

菩提菩萨言：“譬如男子、女人受一日戒无

²⁵⁶ 丽本不分品；永乐北藏本及龙藏本：名字义品第十三

²⁵⁷ 丽本：言；永乐北藏本及龙藏本：名

²⁵⁸ 丽本：（尔时，等行菩萨白佛言下，丹为名字义品第十三）

²⁵⁹ 丽本：我等；永乐北藏本及龙藏本：我

²⁶⁰ 丽本：便说；永乐北藏本及龙藏本：若乐说者，便说

毁无缺，若菩萨如是从初发心乃至成佛，于其中间常修净行，是名菩萨。”

坚意菩萨言：“若菩萨成就深固慈心，是名菩萨。”

度众生菩萨言：“譬如桥船度²⁶¹人不倦无有分别，若心如是，是名菩萨。”

断恶道菩萨言：“若菩萨于诸佛国投足之处，即时一切恶道皆灭，是名菩萨。”

观世音菩萨言：“若菩萨，众生见者，即时毕²⁶²定于阿耨多罗三藐三菩提；又称其名²⁶³，得免众苦，是名菩萨。”

得大势菩萨言：“若菩萨所投足处，震动三千大千世界及魔宫殿，是名菩萨。”

无疲倦菩萨言：“若恒河沙等劫为一日一夜，以是三十日为一月，十二月为一²⁶⁴岁；以是岁数，若过百千万亿劫得值一佛；如是于恒河沙等佛所，行诸梵行修集功德，然后受阿耨多罗三藐三菩提记，心不休息无有疲倦，是名菩萨。”

导师菩萨言：“若菩萨于堕邪道众生生大悲心，令入正道不求恩报，是名菩萨。”

²⁶¹ 丽本：渡；永乐北藏本及龙藏本：度

²⁶² 丽本：毕；永乐北藏本及龙藏本：必；校勘：毕

²⁶³ 丽本：名者；永乐北藏本及龙藏本：名

²⁶⁴ 丽本：为；永乐北藏本及龙藏本：为一

须弥山菩萨言：“若菩萨于一切法无所分别，如须弥山一于²⁶⁵众色，是名菩萨。”

那罗延菩萨言：“若菩萨不为一切烦恼所坏，是名菩萨。”

心力菩萨言：“若菩萨以心思惟一切诸法无有错谬，是名菩萨。”

师子游步自在菩萨言：“若菩萨于诸论中不怖不畏得深法忍，能使一切外道怖畏，是名菩萨。”

不可思议菩萨言：“若菩萨知心相不可思议，无所思惟分别，是名菩萨。”

善寂天子言：“若菩萨能于一切天宮中生而无所染，亦不得是无染之法，是名菩萨。”

实语菩萨言：“若菩萨有所发言常以真实，乃至梦中亦无妄语，是名菩萨。”

喜见菩萨言：“若菩萨能见一切色皆是佛色，是名菩萨。”

常惨菩萨言：“若菩萨见堕生死众生，其心不乐世间诸乐，欲自度己身亦度众生，是名菩萨。”

心无碍菩萨言：“若菩萨于一切烦恼众魔而不瞋碍，是名菩萨。”

²⁶⁵ 丽本：于；永乐北藏本及龙藏本：切；校勘：于

常喜根菩萨言：“若菩萨常以喜²⁶⁶根自满其愿亦满他愿，所作皆办，是名菩萨。”

散疑女菩萨言：“若菩萨于一切法中不生疑悔，是名菩萨。”

师子童女菩萨言：“若菩萨无男法、无女法而现种种色身，为成就众生故，是名菩萨。”

宝女菩萨言：“若菩萨于诸宝中不生爱乐，但乐三宝，是名菩萨。”

毗舍佉达多优婆夷言：“若菩萨有所得者则无菩提，若不得一切法、不生一切法、不灭一切法，是名菩萨。”

跋陀婆罗贤²⁶⁷士言：“若菩萨，众生闻其名者，毕定于阿耨多罗三藐三菩提，是名菩萨。”

宝月童子言：“若菩萨常修童子梵行，乃至不以心念五欲，何况身受？是名菩萨。”

忉利天子曼陀罗华香菩萨言：“若菩萨持戒熏心，常流诸善法香，不流余香，是名菩萨。”

作喜菩萨言：“若菩萨喜乐三法，谓供养佛、演说于²⁶⁸法、教化众生，是名菩萨。”

思益梵天言：“若菩萨所见之法皆是佛法，

²⁶⁶ 丽本：善；永乐北藏本及龙藏本：喜

²⁶⁷ 丽本：居；永乐北藏本及龙藏本：贤

²⁶⁸ 丽本：说；永乐北藏本及龙藏本：说于

是名菩萨。”

弥勒菩萨言：“若菩萨，众生见者，即得慈心三昧，是名菩萨。”

文殊师利法王子言：“若菩萨虽说诸法而不起法想²⁶⁹、不起非法想²⁷⁰，是名菩萨。”

网明菩萨言：“若菩萨光明能灭一切众生烦恼，是名菩萨。”

普华菩萨言：“若菩萨见诸如来满十方世界，如林华敷，是名菩萨。”

如是诸菩萨各各随所乐说已。

尔时，佛告等行菩萨言²⁷¹：“若菩萨能代一切众生受诸苦恼，亦复能舍一切福事与诸众生，是名菩萨。”

论寂品第十四²⁷²

尔时，思益梵天问等行菩萨言：“善男子，汝今以何行为行？”

答言：“我已²⁷³ 随一切有为法众生行为行。”

又问：“随一切有为法众生以何为行？”

²⁶⁹ 丽本：相；永乐北藏本及龙藏本：想

²⁷⁰ 丽本：相；永乐北藏本及龙藏本：想

²⁷¹ 丽本：萨；永乐北藏本及龙藏本：萨言

²⁷² 丽本：论寂品第八；永乐北藏本及龙藏本：论寂品第十四

²⁷³ 丽本：以；永乐北藏本及龙藏本：已

答言：“诸佛所行，是随一切有为法众生行也。”

又问：“诸佛以何为行？”

答言：“诸佛以第一义空为行。”

又问：“凡夫所行，诸佛亦以是行，有何差别？”

等行言：“汝欲令空中有差别耶？”

答言：“不也！”

等行言：“如来不说一切法空耶？”

答言：“然！”

“是故，梵天，一切法无有差别，是诸行相亦复如是。所以者何？如来不说诸法有差别也。”

尔时，思益梵天问文殊师利言：“所言行处²⁷⁴行，为何谓也²⁷⁵？”

答言：“于诸行中有四梵行，是名行处行。若人离四梵行，不名行处行；能行四梵行，是名行处行。梵天，若人成就四梵行，虽于空闲旷野中行，是名行处行；若不成就四梵行，虽于楼殿堂阁、金银床榻、妙好被褥于此中行，不名行处行，亦复不能善知行处相。”

²⁷⁴ 丽本：行；永乐北藏本及龙藏本：行处

²⁷⁵ 丽本：耶；永乐北藏本及龙藏本：也

又问：“菩萨以何行知见清净？”

答言：“于诸行中能净我见。”

又问：“若得我实性，即得实知见耶？”

答言：“然！若见我实性，即是实知见。譬如国王典金藏人，因已出用，知余在者。如是，因知我实性故，得实知见。”

又问：“云何得我实性？”

答言：“若得无我法。所以者何？我毕竟无根本、无决定故。若能如是知者，是名得我实性。”

又问：“如我解文殊师利所说义，以见我故即是见佛。所以者何？我性即是佛性。文殊师利！谁能见佛？”

答言：“不坏我见者。所以者何？我见即是法见，以法见能见佛。”

又问：“颇有无所行名为正行耶？”

答言：“有！若不行一切有为法，是名正行。”

又问：“云何行名为正行？”

答言：“若不为见故行，不为断、不为证、不为修故行，是名正行。”

又问：“慧眼为见何法？”

答言：“若有所见，不名慧眼。慧眼不见有为法、不见无为法。所以者何？有为法皆虚妄分

别，无虚妄分别是名慧眼；无为法空无所有，过诸眼道，是故慧眼亦不见无为法。”

又问：“颇有因缘，正行比丘不得道果²⁷⁶？”

答言：“有！正行中，无道、无果、无行、无得、无有得果差别。梵天，无所得故乃名为得。若有所得，当知是为增上慢人；正行者无增上慢，无增上慢则无行无得。”

又问：“得何法故名为得道？”

答²⁷⁷言：“若法不自生、不他生、亦不众缘生，从本已来常无有生，得是法故说名得道。”

又问：“若法不生，为何所得？”

答言：“若知法不生即名为得，是故佛说：‘若见诸有为法不生相，即入正位。’”

又问：“云何名²⁷⁸正位？”

答言：“我及涅槃等不作二，是名正位。又行平等故，名为正位。以平等出诸苦恼故，名²⁷⁹正位。入了义中故，名²⁸⁰正位。除一切忆念故，名²⁸¹正位。”

尔时，世尊赞文殊师利言：“善哉！善哉！”

²⁷⁶ 丽本：果耶；永乐北藏本及龙藏本：果

²⁷⁷ 丽本：文殊师利；永乐北藏本及龙藏本：答

²⁷⁸ 丽本：何等名为；永乐北藏本及龙藏本：云何名

²⁷⁹ 丽本：名为；永乐北藏本及龙藏本：名

²⁸⁰ 丽本：名为；永乐北藏本及龙藏本：名

²⁸¹ 丽本：名为；永乐北藏本及龙藏本：名

快说此言，诚如所说。”

说是法时，七千比丘不受诸法，漏尽，心得解脱。三万二千诸天远尘离垢，得法眼净。十千人离欲得定，二百人发阿耨多罗三藐三菩提心，五百菩萨得无生法忍。

尔时，思益梵天白佛言：“世尊！是文殊师利法王子能作佛事大饶益众生。”

文殊师利言：“佛出于世，不为益法故出，不为损法故出。”

梵天言：“佛岂不灭度无量众生？仁者亦不利益无量众生耶？”

文殊师利言：“汝欲于无众生中得众生耶？”

答言：“不也！”

“梵天，汝欲得众生决定相耶？”

答言：“不也！”

“梵天，汝欲得诸佛有出生相于世间耶？”

答言：“不也！”

“梵天，何等是众生为佛所灭度者？”

梵天言：“如仁者²⁸²所说义，无生死，无涅槃。”

文殊师利言：“如是！诸佛世尊不得生死、

²⁸² 丽本：仁；永乐北藏本及龙藏本：仁者

不得涅槃；佛诸弟子得解脱者，亦不得生死、不得涅槃。所以者何？是涅槃、是生死，但假名字有言说耳！实无生死往来、灭度²⁸³涅槃。”

又问：“谁能信是法耶？”

答言：“于诸法中无贪著者。”

又问：“若贪著者，于何贪著？”

答言：“贪著者贪著²⁸⁴虚妄。梵天，若贪著是实者，终无增上慢²⁸⁵；以贪著虚妄故，行者知之而不贪著；若不贪著则无有流；若无有流则无往来生死；若无往来生死是则灭度。”

又问：“何故说言灭度？”

答言：“灭度者，名为众缘不和合。若无明不和合诸行因缘，则不起诸行；若不起诸行是名为灭，不起相是毕竟灭。得是道故，则无生处，如是名为四圣谛。”

²⁸³ 丽本：尽得；永乐北藏本及龙藏本：度

²⁸⁴ 丽本：贪著；永乐北藏本及龙藏本：贪著者贪著

²⁸⁵ 丽本：慢人；永乐北藏本及龙藏本：慢

如来二事品第十五²⁸⁶

²⁸⁷尔时，等行菩萨谓文殊师利²⁸⁸：“如汝所说，皆为真实？”

答言：“一切言说皆为真实。”

又问：“虚妄言说亦真实耶？”

答言：“如是！所以者何？是诸言说皆为虚妄，无处无方。若法皆虚妄，无处无方，是故一切言说皆是真实。善男子，提婆达语、如来语无异无别。所以者何？一切言说，皆是如来言说，不出如故。一切言说有所说事，皆以无所说故得有所说，是以²⁸⁹一切言说皆平等²⁹⁰，文字同故，文字无念故，文字空故。”

等行言：“如来不说凡夫语言、贤圣语言耶？”

文殊师利言：“然！以文字说凡夫语言，亦以文字说贤圣语言。如是，善男子，诸文字有分别，是凡夫语言²⁹¹？是贤圣语言²⁹²耶？”

等行言²⁹³：“不也！”

²⁸⁶ 丽本不分品；永乐北藏本及龙藏本：如来二事品第十五

²⁸⁷ 丽本：（尔时下，丹为如来二事品第五）

²⁸⁸ 丽本：利言；永乐北藏本及龙藏本：利

²⁸⁹ 丽本：故；永乐北藏本及龙藏本：以

²⁹⁰ 丽本：等；永乐北藏本及龙藏本：平等

²⁹¹ 丽本：言说；永乐北藏本及龙藏本：语言

²⁹² 丽本：言说；永乐北藏本及龙藏本：语言

²⁹³ 丽本：答言；永乐北藏本及龙藏本：言

文殊师利言：“如诸文字无分别，一切贤圣亦无分别，是故贤圣无有言说。所以者何？贤圣不以文字相、不以众生相、不以法相有所说也。譬诸²⁹⁴钟鼓众缘和合而有音声，是诸钟鼓亦无分别；如是诸贤圣善知众因缘故，于诸言说无贪无碍。”

等行言：“如佛所说：‘汝等集会当行二事，若说法、若圣默然。’何谓说法？何谓圣默然？”

答言：“若说法，不违佛、不违法、不违僧，是名说法。若知法即是佛，离相即是法，无为即是僧，是名圣默然。又，善男子，因四念处有所说，名为说法；于一切法无所忆念，名圣默然。因四正勤有所说，名为说法；以诸法等，不作等，不作不等，名圣默然。因四如意足有所说，名为说法；若不起身心，名圣默然。因五根、五力有所说，名为说法；若不随他语有所信，为不取不舍故分别诸法，一心安住，无念念中解一切法常定性，断一切戏论慧，名圣默然。因七菩提分有所说，名为说法；若常行舍心，无所分别，无增无减，名圣默然。因八圣道分有所说，名为说法；若知说法相如椽喻，不依法，不依非法，名圣默

²⁹⁴ 丽本：如；永乐北藏本及龙藏本：诸

然。善男子，于是三十七助道法若能开解演说，名为说法；若身证是法，亦不离身见法，亦不离法见身，于是观中不见二相，不见不二相，如是现前知见而亦不见，名圣默然。又，善男子，若不妄想著我，不妄想著彼，不妄想著法有所说，名为说法；若至不可说相，能离一切言说音声，得不动处，入离相心，名圣默然。又，善男子，若知一切众生诸根利钝而教诲之，名为说法；常入于定心不散乱，名圣默然。”

等行言：“如我解文殊师利所说义，一切声闻、辟支佛无有说法，亦无圣默然。所以者何？是人不能²⁹⁵了知一切众生诸根利钝，亦复不能常在于定。文殊师利！若有真实问：‘何等是世间说法者？何等是世间圣默然者？’则当为说诸佛是也。所以者何？诸佛善能分别一切众生诸根利钝，亦常在定。”

佛告文殊师利：“如是，如是！如等行所说，唯诸如来²⁹⁶有此二法。”

尔时，须菩提白佛言：“世尊！我亲从佛闻：‘汝等集会当行二事，若说法、若圣默然。’世

²⁹⁵ 丽本：不；永乐北藏本及龙藏本：是人不能

²⁹⁶ 丽本：佛如来；永乐北藏本及龙藏本：如来

尊！若声闻不能行者，云何如来勅诸比丘行此二事？”

佛告须菩提：“于汝意云何？若声闻不从他闻，能说法、能圣默然不？”

须菩提言：“不也。”

“须菩提，是故当知一切声闻、辟支佛无有说法、无圣默然。”

尔时，文殊师利谓须菩提²⁹⁷：“如来²⁹⁸了知众生八万四千行。汝于此中有智慧，能随其所应为说法不？”

答言：“不也！”

“今须菩提能入观一切众生心三昧，住是三昧，通达一切众生心、心所行，自心、他心无所妨碍不？”

答言：“不也！”

文殊师利言：“须菩提²⁹⁹，如来于众生八万四千行，随其所应为说法药。又常住定平等相中心不动摇，而通达一切众生心心所行。须菩提，是故当知，一切声闻、辟支佛不及此事。须菩提，或有众生多淫欲者，以观净得解脱，不以不净；

²⁹⁷ 丽本：须菩提言；永乐北藏本及龙藏本：须菩提

²⁹⁸ 丽本：长老须菩提！如来；永乐北藏本及龙藏本：如来

²⁹⁹ 丽本：“须菩提；永乐北藏本及龙藏本：文殊师利言：“须菩提

唯佛能知。或有众生多瞋恚者，以观过得解脱，不以慈心；唯佛能知。或有众生多愚痴者，以不共语得解脱，不以说法；唯佛能知。或有众生等分行者，不以观净、不以不净、不以观过、不以慈心、不以不共语、不以说法得解脱者，随其根性以诸法平等而为说法使得解脱；唯佛能知。是故如来于诸说法人中为最第一，禅定人中亦最第一。”

尔时，须菩提问文殊师利：“若声闻、辟支佛不能如是说法，不能如是圣默然者，诸菩萨有成就如是功德，能说法、能圣默然不？”

答言：“唯佛当知！”

于是，佛告须菩提：“有三昧名入一切语言心不散乱，若菩萨成就是³⁰⁰三昧皆得是功德。”

尔时，文殊师利谓等行菩萨：“善男子，为众生八万四千行故，说八万四千法藏，名为说法；常在一一切灭受想定³⁰¹中，名圣默然。善男子，我若一劫、若减一劫演³⁰²说是义，是名说法相、是圣默然相，犹不能尽。”

于是，佛告等行菩萨：“善男子，乃往过去

³⁰⁰ 丽本：此；永乐北藏本及龙藏本：是

³⁰¹ 丽本：行定；永乐北藏本及龙藏本：定

³⁰² 丽本：能；永乐北藏本及龙藏本：演

无量无边不可思议阿僧祇劫，时世有佛，号曰普光，劫曰名闻，国名喜³⁰³见。彼国严净、丰乐、安隐，天人炽盛，其地皆以众宝庄严，柔软细滑，生宝莲华，一切香树充满其中，常出妙香。善男子，喜³⁰⁴见国土有四百亿四天下，一一天下纵广八万四千由旬。其中诸城纵广一由旬，皆以众宝校饰。一一城者，有二³⁰⁵万五千聚落村邑而围绕之。一一聚落、村邑无量百千人众充满其中。彼时人民所见色像心皆欣³⁰⁶悦，无可憎恶，亦悉皆得念佛三昧，是以国土名曰喜³⁰⁷见。若他方世界诸来菩萨皆得快乐，余国不尔。善男子，其普光佛以三乘法为弟子说，亦多乐说如是法言³⁰⁸：‘汝等比丘当行二事：若说法、若圣默然。’

“善男子，尔时，上方医王佛土有二菩萨：一名无尽意，二名益意，来诣普光佛所。头面礼佛足³⁰⁹，右绕三匝，恭敬合掌，却住一面。时，普光佛为二菩萨广说净明三昧：‘所以名曰净明三昧者，若菩萨入是三昧，即得解脱一切诸相及

303 丽本：慧；永乐北藏本及龙藏本：喜
304 丽本：慧；永乐北藏本及龙藏本：喜
305 丽本：一；永乐北藏本及龙藏本：二
306 丽本：喜；永乐北藏本及龙藏本：欣
307 丽本：慧；永乐北藏本及龙藏本：喜
308 丽本：音；永乐北藏本及龙藏本：言
309 丽本：足；永乐北藏本及龙藏本：佛足

烦恼著，亦于一切佛法得净光明，是故名为净明三昧。又前际一切法净、后际一切法净、现在一切法净，是三世毕竟净，无能令不净，性常净故，是以说一切诸法性常清净。何谓诸法性净？谓一切法空相，离有所得故；一切法无相相，离忆想分别故；一切法无作相，不取不舍，无求无愿，毕竟离自性故，是名性常清净。以是常净相，知生死性即是涅槃性³¹⁰，涅槃性即是一切法性，是故说心性常清净。善男子，譬如虚空，若受垢污无有是处；心性亦如是，若有垢污无有是处。又如虚空，虽为烟尘云雾覆瞶³¹¹，不明不净，而不能染污虚空之性；设染污者，不可复净，以虚空实不染污故，还见清净。凡夫心亦如是，虽邪忆念起诸烦恼，然其心性³¹²不可垢污；设垢污者，不可复净，以心相实不可³¹³垢污，性常明净。是故心得解脱。善男子，是名入净明三昧门。’彼二菩萨闻是三昧，于诸法中得不可思议法光明。

“尔时，无尽意菩萨白普光如来³¹⁴言：‘世尊！我等已闻入净明三昧³¹⁵。当以何行，行此法

³¹⁰ 丽本：涅槃；永乐北藏本及龙藏本：涅槃性

³¹¹ 丽本：翳；永乐北藏本及龙藏本：瞶

³¹² 丽本：相；永乐北藏本及龙藏本：性

³¹³ 丽本：不；永乐北藏本及龙藏本：不可

³¹⁴ 丽本：佛；永乐北藏本及龙藏本：如来

³¹⁵ 丽本：三昧门；永乐北藏本及龙藏本：三昧

门？’佛告无尽意：‘善男子，汝等当行二行：若说法、若圣默然。’时二菩萨从佛受教，头面礼佛足，绕三匝而出，趣一园林，自以神力化作宝楼于中修行。

“时，有梵天名曰妙光，与七万二千梵俱，来至其所，头面礼足，问二菩萨：‘善男子，普光如来说言：“汝等比丘集会当行二事：若说法、若圣默然。”善男子，何谓说法？何谓圣默然？’二菩萨言：‘汝今善听，我当少说，唯有如来乃通达耳！’于是二菩萨以二句义为诸梵众广分别说。时，七万二千梵皆得无生法忍，妙光梵天得普光明三昧。

“是二菩萨于七万六千岁以无碍辩才³¹⁶答其所问，不懈不息分别二句，互相问答而不穷尽。于是普光如来³¹⁷在虚空中作如是言：‘善男子，勿于文字言说而起诤讼！凡诸言说，皆空如响，如所问答，亦复³¹⁸如是。汝等二人皆得无碍辩才及无尽陀罗尼，若于一劫、若百劫，说此二句辩不可尽。善男子，佛法是寂灭相第一之义，此中无有文字，不可得说；诸所言说皆无义利。是故

³¹⁶ 丽本：力；永乐北藏本及龙藏本：才

³¹⁷ 丽本：佛；永乐北藏本及龙藏本：如来

³¹⁸ 丽本：亦；永乐北藏本及龙藏本：亦复

汝等当随此义，勿随文字。’是二菩萨闻佛教已，默然而止。”

佛告等行：“以是当知，菩萨若以辩才说法，于百千万劫若过百千万劫不可穷尽。”

又告等行：“于意云何，彼二菩萨岂异人乎？勿造斯观！无尽意者今文殊师利是，益意菩萨者今汝身是，妙光梵天者今思益梵天是也³¹⁹。”

³²⁰尔时，等行菩萨白佛言：“未曾有也！世尊！诸佛菩萨³²¹为大饶益，如所说行精进众生。世尊！其懈怠不能如所³²²说行者，虽值百千万佛无能为也，当知从勤精进得出菩提。”

得圣道品第十六³²³

尔时，文殊师利谓等行菩萨：“善男子，汝知菩萨云何行名勤精进？”

答言：“若菩萨能得圣道，名勤精进。”

又问：“云何行能得圣道？”

答言³²⁴：“若于诸法无所分别，如是行者能

³¹⁹ 丽本：是；永乐北藏本及龙藏本：是也

³²⁰ 丽本：伪行品第九（丹无此品，幅末尔时文殊师利下，为得圣道品第十六（夹注幅末当今本纸左十九行））；永乐北藏本及龙藏本无此品

³²¹ 丽本：提；永乐北藏本及龙藏本：萨

³²² 丽本：如；永乐北藏本及龙藏本：如所

³²³ 丽本不分品；永乐北藏本及龙藏本：得圣道品第十六

³²⁴ 丽本：曰；永乐北藏本及龙藏本：言

得圣道。”

又问：“云何名为³²⁵得圣道已？”

答言³²⁶：“若行者于平等中见诸法平等，是名得圣道已。”

又问：“平等可得见耶？”

答言：“不也。所以者何？若平等可见则非平等。”

思益梵天谓文殊师利：“若行者于平等中不见诸法，是名得圣道已。”

文殊师利言：“何故不见？”

思益言：“离二相故不见，不见即是正见。”

又问：“谁能正见世间？”

答言：“不坏世间相者。”

又问：“云何为不坏世间相？”

答言：“色如无别无异，受想行识如无别无异。若行者见五阴平等如相，是名正见世间。”

又问：“何等是世间相？”

答言：“灭尽是世间相。”

又问：“灭尽相复可尽耶？”

答言：“灭尽相者不可尽也。”

³²⁵ 丽本：名；永乐北藏本及龙藏本：名为

³²⁶ 丽本：曰；永乐北藏本及龙藏本：言

又问：“何故说言：‘世间是灭尽相’？”

答言：“世间毕竟尽相，是相不可尽。所以者何？已尽者，不复尽也。”

又问：“佛不说一切有为法是尽相耶？”

答言：“世间是尽相，终不可尽。是故，佛说一切有为法是尽相。”

又问：“何等³²⁷数名有为法？”

答言：“以尽相故，名有为法。”

又问：“有为法者为住何所？”

答言：“无为性中住。”

又问：“有为法、无为法有何差别？”

答言：“有为法、无为法，文字言说有差别耳！所以者何？以文字言说，言是有为、是无为。若求有为、无为实相，则无差别，以实相无差别故。”

又问：“何等是诸法实相义？”

答言：“一切法平等无有差别，是诸法实相义。”

又问：“何等为义？”

答言：“以文字说，令人得解，故名为义。所以者何？实相义者，不如文字所说。诸佛虽以

³²⁷ 丽本：故；永乐北藏本及龙藏本：等

文字有所言说，而于实相无所增减。文殊师利！一切言说皆非言说，是故佛语名不可说，诸佛不可以言相说故。”

又问：“云何得说佛相？”

答言：“诸佛如来不可以色身说相，不可以三十二相说相，不可以诸功德法说相。”

又问：“诸佛可离色身、三十二相、诸功德法而说相耶？”

答言：“不也！所以者何？色身如、三十二相如、诸功德法如；诸佛不即是如，亦非³²⁸离如，如是可说佛相，不失如故。”

又问：“诸佛世尊得何等故号名为佛？”

答言：“诸佛世尊通达诸法性相如故，说名为佛³²⁹、正遍知者。”

志大乘品第十七³³⁰

于是，等行菩萨白佛言：“世尊！何谓菩萨发行大乘？”

尔时，世尊以偈答言：

菩萨不坏色 发行菩提心

³²⁸ 丽本：不；永乐北藏本及龙藏本：非

³²⁹ 丽本：志大乘品第十（丹大乘行品第十七）；永乐北藏本及龙藏本：志大乘品第十七

³³⁰ 丽本：如来；永乐北藏本及龙藏本：为佛

知色即菩提 是名行菩提
如色菩提然 等入于如相
不坏诸法性 是名行菩提
不坏诸法性 则为菩提义
是菩提义中 亦无有菩提
正行第一义 是名行菩提
愚于阴界入 而欲求菩提
阴界入即是 离是无菩提
若有诸菩萨 于上中下法
不取亦不舍 是名行菩提
若法及非法 不分别为二
亦不得不二 是名行菩提
若二则有为 非二则无为
离是二边者 是名行菩提
是人过凡夫 亦不入法位
未得果而圣 是世间福田
行于世间法 处中若³³¹莲华
遵修最上道 是名行菩提
世间所行处 悉于是中行
世间所贪著 于中得解脱
菩萨无所畏 不没生死渊

³³¹ 丽本：如；永乐北藏本及龙藏本：若

无忧无疲倦 而行菩提道
斯人能善知 法性真实相
是故不分别 是法是非法
行于佛道时 无法可舍离
亦无法可受 是名菩提相
一切法无相 犹若如虚空
终不作是念 是相是可相
善知世所行 遍知方便力
能充满一切 众生之所愿
常住于平等 护持佛正法
一切无所念 则是³³²如来法
若有佛无佛 是法常住世
能通达是³³³相 是名护持法
诸法之实相 了达知其义
安住于此中 而为人演说
行于甚深法 魔所不能测
是人于诸法 无所贪著故
愿求诸佛慧 亦不著愿求
是慧于十方 求之不可得
诸佛慧无碍 不著法非法

³³² 丽本：是则；永乐北藏本及龙藏本：则是

³³³ 丽本：此；永乐北藏本及龙藏本：是

若能不着此 究竟得佛道
其诸乐善人 布施转高尊
舍一切所有 而心不倾动
诸法不可舍 亦复不可取
一切世间法 根本不可得
能知一切法 非施非舍相
是名大施主 于法无所见
是等诸菩萨 不计我我所
是故行施时 不生贪惜心
诸所有布施 皆回向佛道
布施及菩提 不住是二相
无作无起戒 常住于此中
亦不作念言³³⁴ 我住是持戒
智者知戒相 不生亦不作
是故戒清净 犹如虚空
观身如镜像 言说如响声
心则如幻化 不以戒自高
其心常柔软 安住³³⁵寂灭性
悉灭³³⁶一切恶 通达于善法
持戒及毁戒 不得此二相

³³⁴ 丽本：是念；永乐北藏本及龙藏本：念言

³³⁵ 丽本：处；永乐北藏本及龙藏本：住

³³⁶ 丽本：除；永乐北藏本及龙藏本：灭

如是见法性 则持无漏戒
已度忍辱岸 能忍一切恶
于诸众生类 其心常平等
诸法念念灭 其性常不住
于中无骂辱 亦无有恭敬
若节节解身 其心终不动
知心不在内 亦复不在外
身怨及刀杖 皆从四大起
于地水火风 未曾有伤损
通达于此事 常行忍辱法
菩萨行如是 众生不能动
勇猛勤精进 坚住于大乘
是人于身心 而无所依止
虽知生死本 其际不可得
为诸众生故 庄严大誓愿
法无决定性³³⁷ 何许有灭相
本际不可得 为颠倒故说
法性不可议 常住于世间
若能知如是 不生亦不灭
菩萨念众生 不解是法相
为之勤精进 令得离颠倒

³³⁷ 丽本：生；永乐北藏本及龙藏本：性

诸佛常不得 众生决定相
而彼弘本愿 当观精进力
思惟一切法 知皆如幻化
不得坚牢相 观之如虚空
从虚妄分别 贪著生苦恼
为斯开法门 令得入涅槃
为彼行精进 而不坏于法
离法非法故 常行真精进
是等行远离 了达无诤定
独处无愤闹 常畏于生死
乐住于闲居 犹如犀一角
游戏诸禅定 明达诸神通
心常住平等 处空闲聚落
威仪无变异 恒乐于禅定
信解常定法 及寂灭无漏
其心得解脱 故说常定者
自住平等法 以此导众生
不违平等行 故说常定者
志念常坚固 不忘菩提心
亦能化众生 故说常定者
常念于诸佛 真实法性身
远离色身相 故说常定者

常修念于法 如诸法实相
亦无有忆念 故说常定者
常修念于僧 僧即是无为
离数及非数 常入如是定³³⁸
悉见十方国³³⁹ 一切群³⁴⁰生类
而于眼色中 终不生二相
诸佛所说法 一切能听受
而于耳声中 亦不生二相
能于一心中 知诸众生心
自心及彼心 此二不分别
忆念过去世 如恒河沙劫
是先及是后 亦复不分别
能至无量土 现诸神通力
而于身心中 无有疲倦想
分别知诸法 乐说辩无尽
于无央数劫 开示法性相
智慧度彼岸 善解阴入界³⁴¹
常为众生说 无取无戏论
善知因缘法 远离二边相
知是烦恼因 亦知是净因

³³⁸ 丽本：者；永乐北藏本及龙藏本：定

³³⁹ 丽本：佛；永乐北藏本及龙藏本：国

³⁴⁰ 丽本：众；永乐北藏本及龙藏本：群

³⁴¹ 丽本：界入；永乐北藏本及龙藏本：入界

信解因缘分 则无诸邪见
法皆属因缘 无有定根本
我见与佛见 空见生死见
涅槃之见等 皆无是诸见
无量智慧光 知诸法实相
无暗无障碍 是行菩提道
是乘名大乘 不可思议乘
悉容诸³⁴²众生 犹不尽其量
一切诸乘中 是乘为第一
如此³⁴³大乘者 能出生余乘
余乘有限量 不能受一切
唯此无上乘 能悉受众生
若行此无量 虚空之大乘
于一切众生 无有悭吝心
虚空无有量 亦无有形色
大乘亦如是 无量无障碍
若一切众生 乘于此大乘
当观是乘相 宽博德所容
无量无数劫 说大乘功德
及乘此乘者 不可得穷尽

³⁴² 丽本：受；永乐北藏本及龙藏本：诸

³⁴³ 丽本：是；永乐北藏本及龙藏本：此

若人闻此³⁴⁴经 乃至持一偈
永脱于诸难 得到安隐处
敬念此经者 舍是身已后
终不堕恶道 常生人天³⁴⁵中
于后恶世时 若得闻是经
我皆与受³⁴⁶记 究竟成佛道
若持³⁴⁷此经者 佛法在是人
是人在佛法 亦能转法轮
若人持是经 能转无量劫
生死诸往来 得近于佛道
若能持是经 精进大智慧
是名极勇猛 能破魔军众
我于燃灯佛 住忍得受记
若有乐是经 我受³⁴⁸记亦然
若人于佛后 能解说是经
佛虽不在世 为能作佛事

佛说是偈时，五千天子皆发阿耨多罗三藐三菩提心；二千菩萨得无生法忍；十千比丘不受诸法，漏尽，心得解脱；三万二千人远尘离垢，于

³⁴⁴ 丽本：是；永乐北藏本及龙藏本：此

³⁴⁵ 丽本：天人；永乐北藏本及龙藏本：人天

³⁴⁶ 丽本：授；永乐北藏本及龙藏本：受

³⁴⁷ 丽本：住；永乐北藏本及龙藏本：持

³⁴⁸ 丽本：授；永乐北藏本及龙藏本：受

诸法中得法眼净。

发菩提心品第十八³⁴⁹

尔时，文殊师利法王子白佛言：“世尊！如我解佛所说义，若有人发菩提愿是为邪愿。所以者何？诸有所得悉皆是邪。若计得菩提而发愿者，是人诸所作行皆为是邪。所以者何？菩提不在欲界，不在色界，不在无色界，菩提无有住处，不应发愿。世尊！譬如有人愿得虚空，宁得虚空³⁵⁰不？”

佛言：“不也！”

“世尊！菩萨亦复如是，发同虚空相菩提之愿，即是发虚空愿，菩提出过三世非是受相，不可愿也。若菩萨起二相发菩提心，作是念：‘生死与菩提异，邪见与菩提异，涅槃与菩提异。’是则不行菩提道也。”

尔时，思益梵天谓文殊师利：“菩萨云何行名菩提行？”

答言：“若菩萨行一切法，而于法无所行，是名行菩提行。所以者何？出过一切所行是行菩

³⁴⁹ 丽本：行道品第十一（丹发菩提心品第十八）；永乐北藏本及龙藏本：发菩提心品第十八

³⁵⁰ 丽本：虚空；永乐北藏本：虚空；龙藏本：空；校勘：虚空

提。”

又问：“云何出过一切所行是行菩提？”

答言：“离眼、耳、鼻、舌、身、意诸缘相，是名出过一切所行。”

又问：“出过有何义？”

答言：“不出过平等。所以者何？一切法平等即是菩提。”

又问：“云何是发菩提愿？”

答言：“当如菩提。”

又问：“云何为菩提？”

答言：“菩提非过去、非未来、非现在，是故菩萨应以三世清净心发菩提愿。梵天，如过去、未来、现在法，从本已³⁵¹来常不生，不生故不可说，如是发愿，无所发愿，是发一切愿。所以者何？以是行道能得萨婆若。”

又问：“何故说言萨婆若？”

答言：“悉知一切真智慧故，名为³⁵²萨婆若。”

又问：“何等是真智慧？”

答言：“无变异相。如众生无变异相，真智慧亦无变异相。”

³⁵¹ 丽本：以；永乐北藏本及龙藏本：已

³⁵² 丽本：名；永乐北藏本及龙藏本：名为

又问：“云何是众生相？”

答言：“假名字毕竟离是众生相，如是相则无变异。若众生与菩提异是为变异，如菩提相，众生亦尔，是故无变异。菩提不可以余道得，但我平等故菩提平等，众生性无³⁵³我故，如是可得菩提。是故，菩提无有变异。所以者何？如虚空无变异相，一切诸法亦无变异相。”

尔时，思益梵天谓文殊师利：“如来是实语者，能说如是法。”

文殊师利言：“如来于法无所说。何以故？如来尚不得诸法，何况说法？”

思益言：“如来岂不分别³⁵⁴诸法，是世间、是出世间，是有为、是无为耶？”

文殊师利言：“于汝意云何？是虚空可说、可分别不？”

思益言：“不也！”

文殊师利言：“今说虚空名字，以所说故有生有灭耶？”

思益言：“不也！”

文殊师利言：“如来说法亦复如是，不以说

³⁵³ 丽本：平等无；永乐北藏本及龙藏本：无

³⁵⁴ 丽本：说；永乐北藏本及龙藏本：分别

故诸法有生有灭，如此说法是不可说相；亦以此法有所教诲，是无所教诲。所以者何？如说法性，不说法性亦如是。是故，说一切法住于如中，如³⁵⁵亦无所住。”

³⁵⁶尔时，释、梵、四天王俱在会中，即以天华散于佛上而作是言：“世尊！若善男子、善女人闻文殊师利说法³⁵⁷，有信解者，当知是人能破魔军及余怨敌³⁵⁸。所以者何？文殊师利今所说法，能破一切邪见妄想。世尊！若善男子、善女人闻于³⁵⁹是法不惊不怖，当知是人不从小功德来。若是经所在之处，当知此处则为诸佛拥护受用。若闻是经处，当知此处转于法轮。是经在所住处聚落、村邑、山林、旷野、塔寺、僧房³⁶⁰、经行之处，诸魔、外道、贪著之人不能侵娆。世尊！若人多供养过去诸佛，乃能得闻如是经典。世尊！我等于此经中得智慧光明，而不能得报佛及文殊师利、思益梵天之恩。世尊！我等所从闻经，于是法师生世尊想；我等常当随侍说是经者，此善

³⁵⁵ 丽本：是如；永乐北藏本及龙藏本：如

³⁵⁶ 丽本此处分品分卷，卷四称叹品第十二（丹无此品名）；永乐北藏本及龙藏本不分卷、不分品

³⁵⁷ 丽本：是法；永乐北藏本及龙藏本：法

³⁵⁸ 丽本：魔怨；永乐北藏本及龙藏本：魔军及余怨敌

³⁵⁹ 丽本：闻；永乐北藏本及龙藏本：闻于

³⁶⁰ 丽本：坊；永乐北藏本及龙藏本：房

男子常为诸天之所拥护。若人书写是经，读诵解说时，无量诸天为听法故来至其所。”

³⁶¹尔时，世尊语³⁶²释、梵、四天王等大众言：“善哉！善哉！如汝所说，若三千大千世界满中珍宝以为一分，闻是经者所得功德以为一分，其福胜彼³⁶³。置是三千大千世界，若恒河沙等十方世界满中珍宝，闻是经者所得功德复胜于彼。诸善男子，若欲得功德者，当听是经；欲得身色端正，欲得财富，欲得眷属，欲得自在，欲得具足天乐人乐，欲得名称，欲得多闻、忆念坚固、正行威仪、戒定智慧、解达经书，欲得善知识，欲得三明六通，欲得一切善法，欲得阿耨多罗三藐三菩提，欲得与一切众生乐具，欲得涅槃者，当听是经，受持读诵，如法修行，广为人说。诸善男子，若行是经者，我不见其人不得如是³⁶⁴具足快乐。

“善³⁶⁵男子，我今语汝，若人所从闻是经处，若和尚³⁶⁶、若阿阇梨，我不见世间供养之具能报其恩。是法出于世间，世间供养所不能报；是法

³⁶¹ 丽本此处分品，咏德品第十三（丹无此品名）；永乐北藏本及龙藏本不分品

³⁶² 丽本：赞；永乐北藏本及龙藏本：语

³⁶³ 丽本：福胜于彼；永乐北藏本及龙藏本：其福胜彼

³⁶⁴ 丽本：此；永乐北藏本及龙藏本：是

³⁶⁵ 丽本：诸善；永乐北藏本及龙藏本：善

³⁶⁶ 丽本：上；永乐北藏本及龙藏本：尚

度于世间，世间财物所不能报；是法无染，染污之物所不能报。诸善男子，是法余无能报，³⁶⁷唯有一事：如说修行。若人于此法中能如说³⁶⁸修行者，是名能报师恩，亦为恭敬于师，净毕报恩；是名不空食人信施；³⁶⁹是则名为顺如来语、顺如来教；是名越³⁷⁰度众流；是名过诸险道；是名建立胜幢；是名能破敌阵；是名师子之王，无所畏故；是名象王，心柔软故；是名牛王，外道论师无能坏故；是名医王，能疗一切³⁷¹病故；是名无所惊怖，能说甚深法故；是名能具足舍，舍诸烦恼故；是名持清净戒，究尽善法故；是名得大忍辱，离我、我所故；是名大精进力，于无量劫心无倦故；是名具足禅定，常念系心住一处故；是名有大智慧，善解言说诸章句故；是名有大³⁷²功德，以无量福庄严身相故；是名有大威德，能蔽日月诸光明故；是名大力，持佛十力故；是名大云，能震法雷故；是名大雨，³⁷³灭烦恼尘故；是名为舍，至涅槃故；是名大救，救生死畏故；是

³⁶⁷ 丽本：惟；永乐北藏本及龙藏本：唯

³⁶⁸ 丽本：行；永乐北藏本及龙藏本：修行

³⁶⁹ 丽本：是名；永乐北藏本及龙藏本：是则名为

³⁷⁰ 丽本：渡诸；永乐北藏本及龙藏本：度众

³⁷¹ 丽本：众生病；永乐北藏本及龙藏本：病

³⁷² 丽本：威；永乐北藏本及龙藏本：功

³⁷³ 丽本：能灭；永乐北藏本及龙藏本：灭

名灯明，离无明暗故；是名归趣，魔所怖者之所依故；是名众生究竟之道；是名得位，坐道场故；是名已得法眼；是名见诸法如；是名知空法相故³⁷⁴；是名安住大悲；是名安立大慈；是名不舍一切众生；是名背于小乘；是名向于大乘；是名除舍颠倒；是名至于平等；是名入于法位；是名安住道场；是名破坏诸魔；是名转于法轮。诸善男子，我若一劫、若减一劫，称扬赞叹说是如说修行功德，不能³⁷⁵穷尽，如来之辩亦不可尽。”

³⁷⁶尔时，会中有天子，名不退转，白佛言：“世尊！所说随法行，随法行者为何谓耶？”

佛告天子：“随法行者，不行一切法，是名随法行。所³⁷⁷以者何？若不行诸法，则不分别是正是邪。如是行者不³⁷⁸行善、不行不善，不行有漏、不行无漏，不行世间、不行出世间，不行有为、不行无为，不行生死、不行涅槃，是名随法行；若起法相者，是则不名随法行也。若念言：‘我行是法。’是则戏论、不随法行；若不受一切法，则随法行；于一切法无忆念、无分别、无

³⁷⁴ 丽本：相；永乐北藏本及龙藏本：相故

³⁷⁵ 丽本：可；永乐北藏本及龙藏本：能

³⁷⁶ 丽本此处分品，等行品第十四（丹无此品名）；永乐北藏本及龙藏本不分品

³⁷⁷ 丽本：所；永乐北藏本及龙藏本：是名随法行。所

³⁷⁸ 丽本：则不；永乐北藏本及龙藏本：不

所行，是名随法行。”

尔时，不退转天子白佛言：“世尊！若能如是随法行者，是人毕竟不复邪行。所以者何？正行者名为毕竟。住邪道者无随法行，住正道者有随法行。世尊！行正行者，无有邪法。所以者何？诸法平等无差别故。”

尔时，思益梵天谓不退转天子：“汝于此中随法行不？”

答言：“若世尊所说法中有二相者，我当行随法行；今以无二相是随法行，于中行者及所行法俱不可得。梵天，我以不二法行随法行，离诸分别故如，诸法如行，是名随法行。”

思益言：“汝未曾见此佛国³⁷⁹土耶？”

天子言：“此佛土亦未曾见我。”

思益言：“此佛土不能思惟分别见与不见。”

天子言：“我亦不思惟分别曾于佛土见与不见。”

思益言：“何人未见能见？”

天子³⁸⁰言：“一切凡夫未见圣法位。若能入者，是为先所未见而见；是法位相非眼所见，非

³⁷⁹ 丽本：佛；永乐北藏本及龙藏本：佛国

³⁸⁰ 丽本：答；永乐北藏本及龙藏本：天子

耳、鼻、舌、身、意、识所知；但应随如相，见如、眼如、乃至意如，法位如亦如是。若能如是见者，是名正见。”

思益梵天所问经卷第三

思益梵天所问经卷第四

姚秦三藏法师鸠摩罗什译³⁸¹

师子吼品第十九³⁸²

³⁸³尔时，释提桓因白佛言：“世尊！譬如贾客主入于宝洲，其所见皆是宝物。如是成就不可思议功德者，有所乐说皆是法宝，所乐说者皆示³⁸⁴实际。所乐说者，于诸法中无所贪著，不著彼我。所乐说者，皆是真实无有颠倒。所乐说者，过去际空，未来际不可得，现在际不起见。所乐说者，不信解者得信解，信解者得解脱。所乐说者，破增上慢；无增上慢者，自说所作已办。所乐说者，魔不得便；所听法者，超度魔事。所乐说者，未生善法令生，已生善法令得增长。所乐说者，已生诸烦恼令断，未生诸烦恼令不生。所乐说者，未大庄严³⁸⁵令大庄严，已大庄严者令不退转。所乐说者，不断灭诸法而护佛法。世尊！以是乐说，能降伏一切外道。所以者何？一切野

³⁸¹ 丽本：姚秦龟兹国三藏鸠摩罗什译

³⁸² 丽本：授不退转天子记品第十五（丹师子吼品第十九）；永乐北藏本及龙藏本：师子吼品第十九

³⁸³ 丽本此处不分卷；永乐北藏本及龙藏本此处为第四卷卷首

³⁸⁴ 丽本：是；永乐北藏本及龙藏本：示

³⁸⁵ 丽本：庄严者；永乐北藏本及龙藏本：庄严

干不能于师子王前自现其身，何况³⁸⁶闻其吼？世尊！一切外道诸论议师不能堪忍无上师子之吼，亦复如是。”³⁸⁷

尔时，不退转天子谓释提桓因：“憍尸迦，所言师子吼师子吼者为何谓也³⁸⁸？”

答言：“若行者说法无所贪著，是名师子吼。若行者贪著所见而有所说，是野干鸣，不名师子吼，起诸邪见故。天子，汝当复说所以为师子吼者？”

天子言：“憍尸迦，有所说法，乃至如来尚不贪著，何况余法？是名师子吼。又，憍尸迦，如说修行名师子吼，决定说法名师子吼，说法无畏名师子吼。又，憍尸迦，若行者为不生、不灭、不出故说法，名师子吼。若为无垢、无净、无合、无散故说法，名师子吼。又，憍尸迦，师子吼名决定说一切法无我、无众生；师子吼名决定说诸法空；师子吼名守护法故而有所说；师子吼名作是愿言：‘我当作佛，灭一切众生苦恼。’；师子吼名于清净所须物中少欲知足；师子吼名常能不舍阿兰若住处；师子吼名行施唱导；师子吼名不

³⁸⁶ 丽本：况；永乐北藏本及龙藏本：何况

³⁸⁷ 丽本此处作注，注曰：（八幅尔时佛告下，丹为梵行牢强精进品第二十）；永乐北藏本及龙藏本无

³⁸⁸ 丽本：耶；永乐北藏本及龙藏本：也

舍持戒；师子吼名等心怨亲；师子吼名常行精进不舍本愿；师子吼名能除烦恼；师子吼名以慧³⁸⁹善知所行。”

说是师子吼法时，三千大千世界六种震动，百千伎乐不鼓自鸣，其大光明普照天地。百千诸天踊跃欢喜言：“我等闻不退转天子说师子吼法，于阎浮提再见转法轮。”

时佛微笑。诸佛常法，若微笑时，若干百千种青、黄、赤、白、红、紫等光从口中出，普照无量无边世界，上过梵世蔽日月光，还绕身三匝，从顶相入。

于是，思益梵天向佛合掌，以偈赞曰：

度一切慧最胜尊	悉知三世众生行
智慧功德及解脱	唯愿演说笑因缘
佛慧无量无障碍	声闻缘觉所不及
知众生心随应 ³⁹⁰ 说	愿最上尊说笑缘
佛光可乐净无秽	普照天人蔽日月
须弥铁围及众山	愿无比尊说笑缘
大圣寂然离瞋恨	天人瞻仰无厌足
一切皆蒙得快乐	愿为分别说笑 ³⁹¹ 缘

³⁸⁹ 丽本：智慧；永乐北藏本及龙藏本：慧

³⁹⁰ 丽本：意；永乐北藏本及龙藏本：应

³⁹¹ 丽本：笑因；永乐北藏本及龙藏本：说笑

通达诸法空无我 水沫云露梦所见
水中月影虚空相 愿以妙音说笑缘
离分别想诸邪见 了空无相及无作
常乐禅定寂然法 愿说放此净光缘
不著文字言音声 说不依法及众生
彼各自谓为我说 愿神通智说笑缘
佛为医王灭众病 那罗延力救世者
趣舍光³⁹²明究竟道 天人供养说笑缘

梵行牢强精进品第二³⁹³

尔时，佛告思益梵天：“汝见是不退转天子不？”

“唯然，已见！”

“梵天，此不退转天子从今已后，过三百二十万阿僧祇劫当得作佛，号须弥灯王如来、应供、正遍知、明行足、善逝、世间解、无上士、调御丈夫、天人师、佛、世尊，世界名妙华³⁹⁴，劫名梵叹。其佛国土以阎浮檀金琉璃为地，纯以菩萨为僧，无诸魔怨。所须之物应念即至，佛寿无量不可计岁³⁹⁵。”

³⁹² 丽本：舍灯；永乐北藏本及龙藏本：舍光

³⁹³ 丽本不分品；永乐北藏本及龙藏本：梵行牢强精进品第二十

³⁹⁴ 丽本：化；永乐北藏本及龙藏本：华

³⁹⁵ 丽本：数；永乐北藏本及龙藏本：岁

于是，思益梵天谓不退转天子：“如来今已授仁者记。”

天子言：“梵天，如与如、法性授³⁹⁶记，与我授³⁹⁷记亦复如是。”

思益言：“如、法性不可授记。”

天子言：“如、法性不可授记者，当知一³⁹⁸切菩萨授³⁹⁹记亦复如是。”

思益言：“若如来不与汝记，汝于过去诸佛所则为空住梵行。”

天子言：“若无所住是住梵行。”

思益言：“云何无住而住梵行？”

答言：“若不住欲界、不住色界、不住无色界，是住梵行。又，梵天，若住⁴⁰⁰者，不住我、不住众生、不住寿命⁴⁰¹、不住人⁴⁰²，是住梵行。以要言之，若不住法、不住非法，是住梵行。”

又问：“梵行⁴⁰³有何义？”

答言：“住不二道，是梵行义！”

又问：“住不二道，为住何所？”

³⁹⁶ 丽本：受；永乐北藏本及龙藏本：授

³⁹⁷ 丽本：受；永乐北藏本及龙藏本：授

³⁹⁸ 丽本：当知一；永乐北藏本：记者当；龙藏本：当知一

³⁹⁹ 丽本：受；永乐北藏本及龙藏本：授

⁴⁰⁰ 丽本：行；永乐北藏本及龙藏本：住

⁴⁰¹ 丽本：命者；永乐北藏本及龙藏本：命

⁴⁰² 丽本：人者；永乐北藏本及龙藏本：人

⁴⁰³ 丽本：行者；永乐北藏本及龙藏本：行

答言：“住不二道，是即不住一切诸法。所以者何？众贤圣无所住、不取于法，能度诸流。”

又问：“云何为修道？”

答言：“不堕有，不堕无，亦不分别是、是无。习如是者，名为修道。”

又问：“以何法修道？”

答言：“不以见、闻、觉、知法，不以得，不以证，于一切法无相无示，名为修道。”

又问：“何谓菩萨牢强精进？”

答言：“若菩萨于诸法不见一相，不见异相，是名菩萨牢强精进大庄严也。于诸法不坏法性故，于诸法无著、无断、无增、无减，不见垢、不见净⁴⁰⁴，出过⁴⁰⁵法性，是名菩萨第一牢强精进⁴⁰⁶，所谓身无所起、心无所起。”

于是，世尊赞不退转天子：“善哉！善哉！”赞已，语思益梵天言：“如⁴⁰⁷天子所说：‘身无所起、心无所起，是为第一牢强精进。’梵天，我念宿世一切所行牢强精进、持戒头陀，于诸师长供养恭敬，在空闲处专精行道，读诵多闻，愍念众生，给其所须；一切难行苦行殷勤精进，而过

⁴⁰⁴ 丽本：净；永乐北藏本及龙藏本：不见净

⁴⁰⁵ 丽本：于；永乐北藏本及龙藏本：过

⁴⁰⁶ 丽本：精进；永乐北藏本及龙藏本：牢强精进

⁴⁰⁷ 丽本：如此；永乐北藏本及龙藏本：如

去诸佛不见授阿耨多罗三藐三菩提记。所以者何？我住身、口、心，起精进相故。梵天，我后得如天子所说牢强精进故，然灯佛授我记言：‘汝于来世当得作佛，号释迦牟尼。’是故，梵天，若菩萨疾欲受记，应当修习如是牢强精进，谓于诸法不起精进相。”

“世尊！何等是不起相精进？”

佛言：“三世等空精进，是名不起相精进。”

“世尊！云何为三世等空精进？”

佛言：“过去心已灭，未来心未至，现在心无住；若法灭不复更起，若未至即无生相，若无住即住实相。又实相亦无有生，若法无生则无去、来、今，若无去、来、今者则从本已来性常不生，是名三世等空精进，能令菩萨疾得授⁴⁰⁸记。

“梵天，菩萨成就如是法忍者，能了达一切法无所舍，是名檀波罗蜜；了达一切法无漏，是名尸罗⁴⁰⁹波罗蜜；了达一切法无伤，是名羸提波罗蜜；了达一切法无所起，是名毗梨耶波罗蜜；了达一切法平等，是名禅波罗蜜；了达一切法无⁴¹⁰分别，是名般若波罗蜜。若菩萨如是了达，则

⁴⁰⁸ 丽本：受；永乐北藏本及龙藏本：授

⁴⁰⁹ 丽本：尸；永乐北藏本及龙藏本：尸罗

⁴¹⁰ 丽本：无所；永乐北藏本及龙藏本：无

于诸法无增无减、无正无邪。是菩萨虽布施，不求果报；虽持戒，无所贪著；虽忍辱，知内外空；虽精进，知无起相；虽禅定，无所依止；虽行慧，无所取相。

“梵天，菩萨成就如是法忍，虽示现一切所行而无所染污。是人得世间平等相，不为利衰、毁誉、称讥、苦乐之所倾动，出过一切世间法故；不自高、不自下、不喜不戚、不动不逸、无二心、离诸缘，得无二法；为堕二见⁴¹¹法众生起大悲心，为其受身而教化之。梵天，是名第一牢强精进，所谓得无我、空、法忍，而于众生起大悲心，为之受身。”

说是牢强精进相时，八千菩萨得无生法忍，佛为受记，皆当得阿耨多罗三藐三菩提，各于异土得成佛道，皆同一号，号坚精进。

海喻品第二十一⁴¹²

尔时，大迦叶白佛言：“世尊！譬如大⁴¹³龙，若欲雨时，雨于大海；此诸菩萨亦复如是，以大法雨雨菩萨心。”

⁴¹¹ 丽本：见二；永乐北藏本及龙藏本：二见

⁴¹² 丽本不分品；永乐北藏本及龙藏本：海喻品第二十一

⁴¹³ 丽本：诸大；永乐北藏本及龙藏本：大

佛言：“迦叶，如汝所说，诸大龙王所以不雨阎浮提者，非有吝也，但以其地不堪受故。所以者何？大龙所雨，澍如车轴。若其雨者，是阎浮提及城邑、聚落、山林、陂池，悉皆漂流如漂枣叶，是故大龙不雨大雨于阎浮提。如是，迦叶，此诸菩萨所以不雨法雨于余众生者，亦无吝心，以其器不堪受如是等法。是故此诸菩萨但于甚深智慧无量大海菩萨心中，雨如是等不可思议无上法雨。

“迦叶，又如大海，堪受大雨，澍如车轴，不增不减；此诸菩萨亦复如是，若于一劫、若复百劫，若听若说，其法湛然，不增不减。

“迦叶，又如大海，百川众流入其中者，同一咸味；此诸菩萨亦复如是，闻种种法、种种议论者⁴¹⁴，皆能信解为一空味。⁴¹⁵

“迦叶，又如大海，澄净无垢，浊水流入即皆清洁；此诸菩萨亦复如是，净诸结恨⁴¹⁶尘劳之垢。

“迦叶，又如大海，甚深无底；此诸菩萨亦

⁴¹⁴ 丽本：论议；永乐北藏本及龙藏本：议论者

⁴¹⁵ 丽本此处作注，注曰：（前幅尔时大迦叶下丹本为海喻品第二十一）；永乐北藏本及龙藏本无

⁴¹⁶ 丽本：恨；永乐北藏本：恨；龙藏本：根；校勘：恨

复如是，能思惟无⁴¹⁷量法，故名为甚深，一切声闻、辟支佛不能测，故名为无底。

“迦叶，又如大海，集无量水；此诸菩萨亦复如是，集无量法、无量智慧，是故说诸菩萨心如大海。

“迦叶，又如大海，积聚种种无量珍宝；此诸菩萨亦复如是，入种种法门，集诸法宝，种种行道，出生无量法宝之聚。

“迦叶，又如大海，有三种宝：一者少价、二者有价、三者无价；此诸菩萨所可说法亦复如是，随诸众生根之利钝令得解脱，有以小乘而得解脱，有以中乘而得解脱，有以大乘而得解脱。

“迦叶，又如大海，渐渐转深；此诸菩萨亦复如是，向萨婆若渐渐转深。

“迦叶，又如大海，不宿死尸；此诸菩萨亦复如是，不宿声闻、辟支佛心，亦不宿悭贪、毁戒、瞋恚、懈怠、乱念、愚痴之心，亦不宿我、人、众生之见。

“迦叶，又如劫尽烧时，诸小陂池、江河、泉源在前枯竭，然后大海乃当消尽；正法灭时亦复如是，诸行小道正法先尽，然后菩萨大海之心

⁴¹⁷ 丽本：入无；永乐北藏本及龙藏本：无

正法乃灭。迦叶，此诸菩萨宁失身命不舍正法。汝谓菩萨失正法耶？勿造斯观。迦叶，如彼大海有金刚珠，名集诸宝，乃至七日出时，火至梵世，而此宝珠不烧不失，转至他方大海之中。若是宝珠在此世界，世界烧者无有是处；此诸菩萨亦复如是，正法灭时，七邪法出，尔乃至于他方世界。何等七？一者，外道论；二者，恶知识；三者，邪用道法；四者，互相恼乱；五者，入邪见棘林；六者，不修福德；七者，无有得道。此七恶出时，是诸菩萨知诸众生不可得度，尔乃至于他方佛国，不离见佛、闻法、教化众生、增长善根。

“迦叶，又如大海，为无量众生之所依止；此诸菩萨亦复如是，众生依止得三种乐：人乐、天乐、涅槃之乐。

“迦叶，又如大海，咸不可饮；此诸菩萨亦复如是，诸魔外道不能吞灭。”

于是，大迦叶白佛言：“世尊！大海虽深尚可测量，此诸菩萨不可测也。”

佛告迦叶：“三千大千世界微尘犹可知数⁴¹⁸，此诸菩萨功德无量不可数也。”

尔时，世尊欲重宣此事，而说偈言：

⁴¹⁸ 丽本：数知；永乐北藏本及龙藏本：知数

譬如大海能悉受 一切众水无满时
此诸菩萨亦如是 常求法利无厌足
又如大海纳众流 一切悉归无损益
此诸菩萨亦如是 听受深法无增减
又如大海不受浊 浊水流入悉清净
此诸菩萨亦如是 不受一切烦恼垢
又如大海无涯底 此诸菩萨亦如是
功德智慧无有量 一切众生不能测
又如大海无别异 百川流入皆一味
此诸菩萨亦如是 所听受法同一相
又如大海所以成 非但为一众生故
此诸菩萨亦如是 普为一切发道心
如海宝名集诸宝⁴¹⁹ 因是宝故有众宝
菩萨宝聚亦如是 从菩萨宝出三宝⁴²⁰
如大海出三种宝 而此大海无分别
菩萨说法亦如是 三乘度人无彼此
又如大海渐渐深 此诸菩萨亦如是
为众生故修功德 回向甚深萨婆若
又如大海不宿尸 此诸菩萨亦如是
发清净心菩提愿 不宿声闻烦恼心

⁴¹⁹ 丽本：珠名集宝；永乐北藏本及龙藏本：名集诸宝

⁴²⁰ 丽本：诸宝；永乐北藏本及龙藏本：三宝

如大海有坚牢宝 其宝名曰集诸宝
劫烧尽⁴²¹时终不烧 转至他方诸佛国
正法灭时亦如是 坚精进者能持法
知诸众生不可度 转至他方诸佛⁴²²国
三千世界欲坏时 火劫将起烧天地
百川众流在前涸 尔⁴²³乃水王于后竭
行小道者亦如是 法欲尽时在前灭
菩萨勇猛不惜身 护持正法后乃尽
若佛在世灭度后 是心中法宝不灭
深心清净住是法 以此善法修行道
百千众生依止海 海成非为一众生
菩萨发心亦如是 为度一切众生故
十方世界诸大海 犹尚可得测其量
是诸菩萨所行道 声闻缘觉不能测
迦叶当知诸菩萨 勇猛精进回向心
愿欲作佛度众生 尚无与等何况胜
是德宝聚如大海 是可供养良福田
是为最上大医王 能疗一切众生病
是世归依作救护 洲渚灯明究竟道
能与世间无明眼 得眼则能服甘露

⁴²¹ 丽本：尽烧；永乐北藏本及龙藏本：烧尽

⁴²² 丽本：所；永乐北藏本及龙藏本：国

⁴²³ 丽本：时；永乐北藏本及龙藏本：乃

是为世间诸法王 是为帝释决断智
是为梵王行四禅 是为能转梵法轮
是为大智导世师 示诸邪径正真道
是为勇猛能破魔 是为清净除恼秽
是修白法如满月 光明高显犹如日
智慧超出如须弥 犹如密云雨甘露
是无所畏如狮子 是心调柔如象王
是则譬如金刚山 一切外道不能坏
是则清净犹如水 是有威猛如大火
是则如风无障碍 是则如地无能动
是拔憍慢我根等 是如药树无分别
是持净戒如莲华 是于世法无所染
是如优昙钵罗华 千万亿劫时一出
是为知报佛之恩 是为不断诸佛种
是为精进行大悲 是用慈喜而超出
是能舍离五欲心 是常求佛法宝财
是行布施为最胜 是持净戒无等侶
是忍辱健无⁴²⁴俦匹 是勤精进无厌倦
是行禅定具神通 能至无量诸佛土
常见诸佛听受法 如其所闻为人说
是知众生所行道 随其性欲根利钝

⁴²⁴ 丽本：畴；永乐北藏本及龙藏本：俦

是名善知方便力 是然慧灯得济处
是能善知一切法 皆从和合因缘生
是能决了因缘相 离于我见乐平等
是能正观于诸法 为从何来至何所
善知诸法无去来 常住法性而不动
是见有为法皆空 增益大悲济众生
众生妄想起众苦 为欲度故修行道
凡夫分别我我所 行于种种诸邪径⁴²⁵
是能晓了法实相 为断诸见讲说法
无常为常不净⁴²⁶ 净 无我谓我苦为乐
凡夫颠倒贪著故 生死前际不可知
是能知此从颠倒 无我无人无众生
我当如是修正道 无常乐我⁴²⁷ 及不净
迦叶当知此菩萨 我所称赞诸功德
于其所行不可尽 犹如大地举一尘
若发菩提心不退 三千大千供养具
若复有供过于是 悉应供养如是人
若人发心愿作佛 是则恭敬供养我
于去来今十方⁴²⁸ 佛 亦皆恭敬供养已

⁴²⁵ 丽本：见；永乐北藏本及龙藏本：径

⁴²⁶ 丽本：清；永乐北藏本及龙藏本：净

⁴²⁷ 丽本：我乐；永乐北藏本及龙藏本：乐我

⁴²⁸ 丽本：诸去来现在；永乐北藏本及龙藏本：去来今十方

建立法品第二十二⁴²⁹

尔时，思益梵天谓文殊师利法王子：“当请如来护念斯经，于后末世五百岁时令广流布。”

文殊师利言：“于意云何？佛于是经有说⁴³⁰、有示、可护念耶⁴³¹？”

思益言：“不也。”

“梵天，是故当知，一切法无说、无示、无有护念，是法终不可灭、不可护念。若欲护此法者，为欲护念虚空。梵天，菩萨若⁴³²欲有所受法⁴³³，即非法言。所以者何？出过一切言论，是名菩萨乐无诤讼。梵天，若有菩萨于此众中作是念：‘今说是法。’当知是人即非听法。所以者何？不听法者乃为听法。”

梵天言：“何故说不听法者乃为听法？”

文殊师利言：“不漏眼⁴³⁴、耳、鼻、舌、身、意⁴³⁵，是听法也。所以者何？若于内六入不漏，色、声、香、味、触、法中乃为听法。”

⁴²⁹ 丽本：建立法品第十六（丹天子授记品第二十二）；永乐北藏本及龙藏本：建立法品第二十二

⁴³⁰ 丽本：有法、有说；永乐北藏本及龙藏本：有说

⁴³¹ 丽本：不；永乐北藏本及龙藏本：耶

⁴³² 丽本：若言；永乐北藏本及龙藏本：若

⁴³³ 丽本：法者；永乐北藏本及龙藏本：法

⁴³⁴ 丽本：眼；永乐北藏本及龙藏本：不漏眼

⁴³⁵ 丽本：不漏；永乐北藏本及龙藏本：意

尔时会中三万二千天子、五百比丘、三百比丘尼、八百优婆塞⁴³⁶，闻文殊师利所说，皆得无生法忍；得是忍已作是言：“如是！如是！文殊师利，如仁者所说，不听法者乃为听法。”

尔时，思益梵天问得忍诸菩萨言：“汝等岂不听是经耶？”

诸菩萨言：“如我等听，以不听为听。”

又问：“汝等云何知是法耶？”

答言：“以不知为知。”

又问：“汝等得何等故名为得忍？”

答言：“以一切法不可得故，我等名为得忍。”

思益言：“云何随是法行？”

答言：“以不随行故随行。”

又问：“汝等于此法中明了通达耶？”

答言：“一切诸法皆明了通达，无彼我故。”

尔时，会中有天子名净相，谓思益梵天：“若有但闻此经佛不与受记者，我当授其阿耨多罗三藐三菩提记。所以者何？此经不破因果、能生一切善法、能坏魔怨、离诸憎爱、能令众生心得清净、能令信者皆得欢喜、除诸瞋恨。斯经一切善人之所修行，斯经一切诸佛之所护念，斯经一切

⁴³⁶ 丽本：八百优婆塞、八百优婆夷；永乐北藏本及龙藏本：八百优婆塞

世间天、人、阿修罗所共守护，斯经决定至不退转故，斯经不诳至道场故，斯经真实能令众生得诸佛法，斯经能转法轮，斯经能除疑悔，斯经能开圣道，斯经求解脱者所应善听，斯经欲得陀罗尼者所应善持，斯经求福之人所应善说，斯经乐法之人所应善念。斯经能与快乐至于涅槃，斯经若魔外道有所得人所不能断，斯经应受供养人能随其义，斯经能令利根者欣悦，斯经能令智慧者欢喜。斯经能与人慧，离诸见故；斯经能与人智，破愚痴故。斯经文辞次第善说，斯经究竟善随义说，斯经多所利益说第一义，斯经爱乐法人之所贪惜，斯经有智之人所不能离，斯经施者之大藏，斯经热恼⁴³⁷之凉⁴³⁸池，斯经能令慈者心等，斯经能令懈怠者精进，斯经能令妄念者得定，斯经能与愚者慧明。梵天，斯经一切诸佛之所贵重。”

净相天子说是法时，三千大千世界皆大震⁴³⁹动。佛即赞言：“善哉！善哉！天子，如汝所说。”

尔时，思益梵天白佛言：“世尊！是天子曾于过去诸佛所闻是经耶？”

佛言：“是天子已于六十四亿佛⁴⁴⁰所，得闻

⁴³⁷ 丽本：恼者；永乐北藏本及龙藏本：恼

⁴³⁸ 丽本：清凉；永乐北藏本及龙藏本：凉

⁴³⁹ 丽本：振；永乐北藏本及龙藏本：震

⁴⁴⁰ 丽本：诸佛；永乐北藏本及龙藏本：佛

是经。过四万二千劫当得作佛，号宝庄严，国名多宝。于其中间有诸佛出，皆得供养亦闻是经。梵天，是诸比丘、比丘尼、优婆塞、优婆夷，诸天、龙、鬼神在此会中得法忍者，皆当得生多宝国土。”

尔时，净相天子白佛言：“世尊！我不求菩提、不愿菩提、不贪菩提、不乐菩提、不念⁴⁴¹不分别菩提，云何如来见授记耶？”

佛告天子：“如以草木茎节枝叶投于火中，而语之言：‘汝等莫然！汝等莫然！’若以是语而不然者，无有是处。天子，菩萨亦如是，虽不喜乐贪著菩提，当知是人已为一切诸佛所记。所以者何？若菩萨不喜、不乐、不贪、不著、不得菩提，则于诸佛必得受阿耨多罗三藐三菩提记。”

尔时，会中有五百菩萨白佛言：“世尊！我等今不求菩提、不愿菩提、不喜不乐⁴⁴²菩提、不贪著菩提、不思念菩提、不分别菩提。”作是语已，以佛神力即见上方八万四千诸佛，授其阿耨多罗三藐三菩提记。

尔时，五百菩萨白佛言：“未曾有也！世尊！

⁴⁴¹ 丽本：不念菩提；永乐北藏本及龙藏本：不念

⁴⁴² 丽本：乐；永乐北藏本及龙藏本：不乐

如来所说甚善快哉！所谓菩萨不求、不愿、不贪、不喜、不得菩提而诸佛授记。世尊！我等今见上方八万四千诸佛，诸佛皆与我等授⁴⁴³阿耨多罗三藐三菩提记。”

如来神咒品第二十三⁴⁴⁴

尔时，文殊师利白佛言：“唯⁴⁴⁵愿世尊护念是经⁴⁴⁶，于当来世后五百岁，广宣流布此阎浮提，令得久住；又令大庄严善男子、善女人咸得闻之；设魔事种种起而能不随魔，若魔民不得其便⁴⁴⁷；以受持是经故，终不退失阿耨多罗三藐三菩提。”

尔时，佛告文殊师利：“如是！如是！汝今善听！欲令此经久住故，当为汝说召诸天、龙、夜叉、乾闥婆、鸠槃荼等咒术。若法师诵持此咒，则能致诸天、龙、夜叉、乾闥婆、阿修罗、迦楼罗、紧那罗、摩睺罗伽等，常随护之。是法师若行道路、若失道时、若在聚落、若在空闲、若在僧坊⁴⁴⁸、若在宴室、若经行处、若在众会，是诸神等常当随侍卫护，益其乐说辩才。又复为作坚

⁴⁴³ 丽本：受；永乐北藏本及龙藏本：授

⁴⁴⁴ 丽本：诸天叹品第十七（丹如来神咒品第二十三）；永乐北藏本及龙藏本：

⁴⁴⁵ 丽本：惟；永乐北藏本及龙藏本：唯

⁴⁴⁶ 丽本：法；永乐北藏本及龙藏本：经

⁴⁴⁷ 丽本：亦不得便；永乐北藏本及龙藏本：不得其便

⁴⁴⁸ 丽本：房；永乐北藏本及龙藏本：坊

固忆念慧力因缘，无有怨贼得其便者，使是法师行、立、坐、卧一心安详。文殊师利，何等为咒术章句？

“郁⁴⁴⁹头隶 头头隶 摩隶 遮隶 麁隶 梯隶 缇隶 弥隶 睺楼 睺楼 睺楼 堙婆隶 韦多隶 曲丘隶 阿那祢 伽帝 摩醯履 摩那徙 摩祢 婆睺乾地萨波楼帝 罗婆波⁴⁵⁰ 伽帝 辛头隶 南无佛驮遮梨⁴⁵¹ 帝隶 南无达摩涅伽陀祢 南无僧伽和醯陀⁴⁵² 毗波⁴⁵³ 扇陀祢 萨婆波⁴⁵⁴ 祢麁帝隶 弥浮提底⁴⁵⁵ 萨遮涅提舍 梵岚摩波舍 多兮⁴⁵⁶ 利师鞞波舍多 阿哆罗提佉⁴⁵⁷ 提萨婆浮多伽娑⁴⁵⁸ 呵^{呼奈⁴⁵⁹切} 南无佛驮悉缠斗曼哆逻⁴⁶⁰

“文殊师利，是为咒术章句。若菩萨摩訶萨欲行此经者，当诵持是咒术章句，应一心行，不调戏、不散乱，举动进止悉令净洁，不畜余食；少欲知足，独处远离，不乐愤闹，身心远离；常

449 丽本：鬱；永乐北藏本及龙藏本：郁

450 丽本：娑；永乐北藏本及龙藏本：波

451 丽本：黎；永乐北藏本及龙藏本：梨

452 丽本：和醯陀和醯陀；永乐北藏本及龙藏本：和醯陀

453 丽本：娑；永乐北藏本及龙藏本：波

454 丽本：波波；永乐北藏本及龙藏本：波

455 丽本：履；永乐北藏本及龙藏本：底

456 丽本：予；永乐北藏本及龙藏本：兮

457 丽本：佉（佉，勅写反）；永乐北藏本及龙藏本：佉

458 丽本：罗；永乐北藏本及龙藏本：娑

459 丽本：（呵，呼奈反）；永乐北藏本及龙藏本：（呼奈切）

460 丽本：逻。一切众生中慈说圣谛，梵天所赞叹！诸贤圣所赞叹！此中住召一切诸神，南无诸佛，当成就是咒术；永乐北藏本及龙藏本：逻

乐慈悲，以法喜乐；安住实语，不欺诳人；贵于坐禅，乐欲说法；行于正念，常离邪念；常乐头陀细行之法，于得、不得无有忧喜；趣向涅槃，畏厌生死；等心憎爱，离别异相；不吝身命及一切物，无有贪惜；威仪成就，常乐持戒；忍辱调柔，恶言能忍；颜色和悦，无恶姿容；先意问讯，除去憍慢，同止⁴⁶¹欢乐。

“文殊师利，此法⁴⁶²师住如是法，诵是咒术，即于现世得十种力。何等为十？得念力，不忘失故；得慧力，善择法故；得行力，随经意故；得坚固力，行生死故；得惭愧力，护彼我故；得多闻力，具足慧故；得陀罗尼力，一切闻能持故；得乐说辩力，诸佛护念故；得深法力，具五通故；得无生忍力，速得具足萨婆若故。文殊师利，若法师能住是行，诵持咒术，现世得是十力。”

佛说是咒术力时，四天王惊怖毛竖，与无量鬼神眷属围绕，前诣佛所，头面礼足，白佛言：“世尊！我是四天王，得须陀洹道，顺佛教者。我等各当率诸亲属、营从、人民，卫护法师。若善男子、善女人护念法者，能持如是等经读诵解

⁴⁶¹ 丽本：心；永乐北藏本及龙藏本：止

⁴⁶² 丽本：诸法；永乐北藏本及龙藏本：法

说，我等四天王常往卫护。是人所在之处，若城邑聚落、若空闲静处、若在家、若出家，我等及眷属常当随侍供给，令心安隐，无有厌倦，亦使一切无能娆者。世尊！又是经所在之处面五十里，若天、天子，若龙、龙子，若夜叉、夜叉子，若鸠槃荼、鸠槃荼子等，不能得便。”

尔时，毗留⁴⁶³勒迦护世天王即说偈言：

我所有眷属 亲戚及人民
皆当共卫护 供养是法师

尔时，毗留⁴⁶⁴婆叉天王即说偈言：

我是法王子 从法而化生
求菩提佛子 我皆当供给

尔时，捷驮罗吒天王即说偈言：

若有诸法师 能持如是经
我常当卫护 周遍于十方

尔时，毗捺婆那天王即说偈言：

是人发道心 所应受供养
一切诸众生 无能办⁴⁶⁵之者

尔时，毗捺婆那天王子，名曰善宝，持七宝盖，奉上如来，即说偈言：

⁴⁶³ 丽本：楼；永乐北藏本及龙藏本：留

⁴⁶⁴ 丽本：楼；永乐北藏本及龙藏本：留

⁴⁶⁵ 丽本：办；永乐北藏本及龙藏本：辨；校勘：办

世尊我今当 受持如是经
亦为他人说 我有如是心
世尊知我心 及先世所行
从初所发意 至诚求佛道
世尊无见顶 今奉此妙盖
愿我得如是 无见之顶相
我以爱敬心 瞻仰于世尊
愿成清净眼 得见弥勒佛
度智慧世尊 即时以偈答
汝于此命终 即生兜率⁴⁶⁶天
从兜率⁴⁶⁷下生 得见弥勒佛
二万岁供养 尔乃行出家
既得出家已 净修于梵行
贤劫中诸佛 一切悉得见
亦皆⁴⁶⁸供养之 于彼修梵行
过六十亿劫 汝当得成佛
号名为宝盖 国土甚严净
唯有菩萨僧 为讲说妙法
寿命尽一劫 若灭度已后
正法住半劫 利益诸众生

⁴⁶⁶ 丽本：术；永乐北藏本及龙藏本：率

⁴⁶⁷ 丽本：术；永乐北藏本及龙藏本：率

⁴⁶⁸ 丽本：得；永乐北藏本及龙藏本：皆

尔时，释提桓因与无数百千诸天围绕，白佛言：“世尊！我今亦当卫护能持如是之⁴⁶⁹经诸法师等，供养供给。是经所在之处，若读诵解说，我为听受法故往诣其所；又当增益法师气力，法句次第令不漏失。”

尔时，释提桓因子名曰劬婆伽，持真珠盖七宝庄严，奉上如来，即说偈言：

我常现了知	世尊之所行 ⁴⁷⁰
亦当如是行	求佛一切智
世尊于前世	无物不施与
我当随此行	亦舍诸所有
我今法王前	受持如是经
当数为人说	以报如来恩
若爱念是经	是即与我同
我当供养之	为得菩提故
世尊声闻人	不能守护法
于后恐怖世	我当护是经
世尊安慰我	又断诸天疑
我今当久如	得佛如世尊
佛通达智慧	即时与授 ⁴⁷¹ 记

⁴⁶⁹ 丽本：比；永乐北藏本及龙藏本：之

⁴⁷⁰ 丽本：说；永乐北藏本及龙藏本：行

⁴⁷¹ 丽本：受；永乐北藏本及龙藏本：授

汝后当作佛 如我今无异
过去千万⁴⁷²劫 又复过百劫⁴⁷³
尔乃得成佛 号曰为智王

尔时，娑婆世界主梵天王白佛言：“世尊！我舍禅定乐，往诣法师。若善男子、善女人，能⁴⁷⁴说是法者，所以者何？从如是等经出帝释、梵王、诸豪尊等。世尊！我当供养是诸善男子，是诸善女人⁴⁷⁵应受一切世间天、人、阿修罗之所供养。”

尔时，妙梵天子⁴⁷⁶即说偈言：

比丘比丘尼 诸清信士女
其能受此⁴⁷⁷经 是世供养处
乃至有一人 能行是经者
我要当为人⁴⁷⁸ 演说如是经
敷众妙华座 高至于梵天
于此座上坐 演说如是经
若于恶世中 所从闻此经
应发希有心 踊跃称善哉

⁴⁷² 丽本：过于千亿；永乐北藏本及龙藏本：过去千万

⁴⁷³ 丽本：亿；永乐北藏本及龙藏本：劫

⁴⁷⁴ 丽本：若；永乐北藏本及龙藏本：能

⁴⁷⁵ 丽本：男子；永乐北藏本及龙藏本：女人

⁴⁷⁶ 丽本：王；永乐北藏本及龙藏本：子

⁴⁷⁷ 丽本：是；永乐北藏本及龙藏本：此

⁴⁷⁸ 丽本：之；永乐北藏本及龙藏本：人

若无量世界 大火悉充满
要当从中过 往听如是经
能开佛道经 若欲得闻者
积宝如须弥 应尽供是人

嘱累品第二十四⁴⁷⁹

尔时，世尊现神通力，令魔波旬及其军众来诣佛所作是言：“世尊！我与眷属今于佛前立此誓愿：‘是经所流布处，若说法者及听法者，并彼国土不起魔事，亦当拥护是经！’”

尔时，世尊放金色光照此世界，告文殊师利言：“如来今护念是经，利益诸法师故。是经在阎浮提，随其岁数佛法不灭。”

尔时，会中众生以一切华、一切香、一切末香而散佛上，作是言：“世尊！愿使是经久住阎浮提，广宣流布。”

于是，佛告阿难：“汝受持是经不？”

阿难言：“唯然，受持！”

“阿难，我今以是经嘱累于汝，受持、读诵、为人广说。”

阿难白佛言：“世尊！若人受持是经，读诵

⁴⁷⁹ 丽本：嘱累品第十八（丹第二十四）；永乐北藏本及龙藏本：嘱累品第二十四

解说，得几所功德？”

佛告阿难：“随是经所有文字、章句之数，尽寿以一切乐具供养尔所诸佛及僧；若人乃至供养是⁴⁸⁰经，恭敬、尊重、赞叹，其福为胜。是人现世得⁴⁸¹十德之藏。何等为⁴⁸²十？见佛藏，得天眼故；听法藏，得天耳故；见僧藏，得不退转菩萨僧故；无尽财藏，得宝手故；色身藏，具三十二相故；眷属藏，得不可坏眷属故；所未闻法藏，得陀罗尼故；忆念藏，得乐说辩故；无所畏藏，破坏一切外道论故；福德藏，利益众生故；智慧藏，得一切佛法故。”

佛说是经时，七十二那由他众生得无生法忍，无量众生发阿耨多罗三藐三菩提心，无数众生不受诸法，漏尽，心得解脱。

尔时，阿难即从坐起，偏袒右肩，头面礼足⁴⁸³，白佛言：“世尊！当何名此经？云何奉持？”

佛告阿难：“此经名为摄一切法，亦名庄严诸佛法，又名思益梵天所问，又名文殊师利论议，当奉持之。”

佛说是经已，文殊师利法王子及思益梵天、

⁴⁸⁰ 丽本：经卷；永乐北藏本及龙藏本：经

⁴⁸¹ 丽本：十一功；永乐北藏本及龙藏本：十

⁴⁸² 丽本：十一；永乐北藏本及龙藏本：十

⁴⁸³ 丽本：佛足；永乐北藏本及龙藏本：足

等行菩萨、长老摩诃迦叶、慧命阿难，及诸天众、一切世人，受持佛语，皆大欢喜。

思益梵天所问经卷第四

● 结诵仪

补阙真言

(三遍)

南無喝啰怛那. 哆啰夜耶. 佉啰佉啰. 俱住俱住.
摩啰摩啰. 虎啰. 吽. 贺贺. 苏怛拏. 吽. 泼抹拏. 娑
婆诃.

补阙圆满真言

(三遍)

唵. 呼嚧呼嚧. 社曳穆契. 莎诃.

普回向真言

(三遍)

唵^一娑摩啰^二娑摩啰^三弥摩曩^四萨哈^{呼马切}啰^五摩诃咱^{爻上声}
哈啰吽^六

南無佛 南無法 南無僧 (合掌三称)

南無本师释迦牟尼佛 (合掌三称)

南無文殊师利菩萨摩诃萨 (合掌三称)

南無护法诸天菩萨 (合掌三称)

礼佛发愿文

(一遍)

归命十方调御师 演扬清净微妙法
三乘四果解脱僧 愿赐慈悲哀摄受

但(某甲)自违真性，枉入迷流。随生死以飘沉，逐色声而贪染。十缠十使，积成有漏之因；六根六尘，妄作无边之罪。迷沦苦海，深溺邪途。著我耽人，举枉措直。累生业障，一切愆尤，仰三宝以慈悲，沥一心而忏悔。

所愿能仁拯拔，善友提携。出烦恼之深源，到菩提之彼岸。此世福基命位，各愿昌隆；来生智种灵苗，同希增秀。生逢中国，长遇明师。正信出家，童真入道。六根通利，三业纯和。不染世缘，常修梵行。执持禁戒，尘业不侵。严护威仪，蝇飞无损。不逢八难，不缺四缘。般若智以现前，菩提心而不退。修习正法，了悟大乘。开六度之行门，越三祇之劫海。建法幢于处处，破疑网于重重。降伏众魔，绍隆三宝。承事十方诸佛，无有疲劳。修学一切法门，悉皆通达。广作福慧，普利尘沙。得六种之神通，圆一生之佛果。然后不舍法界，遍入尘劳。等观音之慈心，行普

贤之愿海。他方此界，逐类随形。应现色身，演扬妙法。泥犁苦趣，饿鬼道中，或放大光明，或现诸神变，其有见我相，乃至闻我名，皆发菩提心，永出轮回苦。火镬冰河之地，变作香林；饮铜食铁之徒，化生净土。披毛戴角，负债含怨，尽罢辛酸，咸沾利乐。疾疫世而现为药草，救疗沉痾；饥馑时而化作稻粱，济诸贫馁。但有利益，无不兴崇。次期累世冤亲，现存眷属，出四生之汨没，舍万劫之爱缠。等与含生，齐成佛道。虚空有尽，我愿无穷。情与无情，同圆种智。

回向偈

(一遍)

愿以此功德 庄严佛净土
上报四重恩 下济三途苦
若有见闻者 悉发菩提心
尽此一报身 同生极乐国

十方三世一切佛。一切菩萨摩訶萨。摩訶般若波罗蜜。

三皈依

(一遍)

自皈依佛，当愿众生，体解大道，发无上心；
自皈依法，当愿众生，深入经藏，智慧如海；自
皈依僧，当愿众生，统理大众，一切无碍。和南
圣众。



此咒置经书中可灭误跨之罪

南无护法韦驮尊天菩萨

